

**Paulo Ena Malele Lava'ana'ina  
KOLINTO (1)  
Kauta Kevatai**

*Puka Laloana Ielena Luvana*

Paulo ena melalai, Kolinto 'eva vanua namana Akaia kanona laloanai Elene 'abuna. Paulo sibona 'eva kau lava'ana'ina Iesu valina nama'ina Kolin-toai eiloloa, beia eda'aovo ede'a 'abu vaida ena vinaula bevavaia laloanai abiveni kauta vilodatai adedua namata vaida depulu.

Kanaua 'ounai malele kanania eleleia, kevatai beluvavaia kave'i mai eta adedua vaka bevako-molota. Ena makau namana 'eva eta abiveni asi'i ema'ekoasi 'ounai, maivaka eta koakoa mediata vaka si'avata vaikai asi'i demaao. Dala nama'ina kanaua dekamoane kauta bemaui vaia eluvavaia kave'i, maivaka kanaua 'eva dava namana inoku bevavaia 'eva enama'ina. Mai Paulo ediaka, ade-dua katania kau kevatai depupulu 'olana Idume Kabukabuna eta maui be'ana'ia vaita 'eva sia de'ula 'ounai. Paulo ediaka, dala nama'inanai eka mia maivaka Idume Kabukabuna ena vidulu abiveni kauta kevatai davata lovata eaku. Ba kauta kataua eta ko'isi 'udai lovata eako. Kata-nia boutai 'eva Kolinto kauta eta adedua davata. Paulo eta'u luva nama'ita doutamo evenita Dilava ena ula kanaua beikabasia.

Puka kanania elena 13 laloanai 'eva Paulo eta'u dalana nama'ina kanaua kau ilalo'auvenita lo-vana eakuia, kanaua 'eva Idume Kabukabuna ena veniveni davana nama'ina eveni davata boutai akatai, inoku Dilava sibona etata'u ena kau evenita.

*Puka Iduvuna Namata*

- a. Lova aku. (1.1 - 9)
- b. Koa oletā Dilava ena lo'e laloanai. (1.10 – 4.21)
- c. Kulakula koakoata si'avata vaika mai luma maolina. (5.1 – 7.40)
- d. Abiveni kauta mai si'avana kauta. (8.1 – 11.1)
- e. Lo'e maolina mai kukudivo dalana. (11.2 – 14.40)
- f. Keliso mai abiveni kauta eta ko'isi 'udai. (15.1 - 58)
- g. Abiveni kauta eta vidulu Iudea eta. (16.1 - 4)
- h. Paulo ena ula luvana mai luva to'ota. (16.5 - 24)

### *Vanama'ina Luvana.*

<sup>1</sup> Lau Paulo, Keliso Iesu ena veauneke kau'u Dilava ena ulai e'ae'u, mai abiveniai bo'akalata Sosotene ita,

<sup>2</sup> malele kanania lai alelea evavasi Dilava ena lo'e kaumui Kolinto vanuanai kevamui, oi Keliso Iesu enai edilamui mai e'aemui Dilava ena kabuk-abu kaumuiiai oi bo'ao, mai 'abu boutai eta Lovia namana Iesu Keliso vana de'aea mai dekukudivo venia kauta kataua boutai kevatai. Iesu Keliso 'eva ia mai ita eta Lovia namana.

<sup>3</sup> Lai ameamea Dilava ita Kamata mai Lovia namana Iesu Keliso eta iulaveni mai nua'elu bevenimui.

### *Paulo Vanama'ina Luvana Dilava Evenia.*

<sup>4</sup> Lau melala boutai Dilava avanama'inala oi daimuiiai 'olana Keliso Iesu laloanai Dilava ena iulaveni evenimui.

<sup>5</sup> 'Olana Keliso laloanai oi 'eva dala boutai laloatai, emui luvaluva boutai mai emui ikabasi boutai 'ani evaloviata.

<sup>6</sup> Keliso valina lai akavala valina nuamuiai 'ani ekula'ila.

<sup>7</sup> Kanaua 'ounai vali'u oi 'eva Idume Kabuk-abuna ena ainama sia kai oi otabu beia ovi'ima beda'amo eta Lovia namana Iesu Keliso bemue 'udai.

<sup>8</sup> Iesu betata'u bevalava 'inimui beda'amo to'onai, inoku ia ena asi melalanai oi 'eva va'eva sia bevakoamui.

<sup>9</sup> Dilava 'eva lele ivavua venina kauna, ia eta'u oi e'aemui oi boda'a Nakuna Iesu Keliso ita eta Lovia namana ita oi bovaka'onamo.

### *Dilava Ena Lo'e Kauta Viloata Edau'a.*

<sup>10</sup> Bo'akala'u e, eta Lovia namana Iesu Keliso vanai anoimui, boumuiai emui luvaluva beka'onamo inoku viloamui sia be'alama, beia oi bovaka'onamo kave'i nuamuiai maivaka emui lalovailalovaiai.

<sup>11</sup> Bo'akala'u e, Koloe ena luma kauta vaida de'ou'u oi viloamuiai 'eva viala depupulu.

<sup>12</sup> Lau a'oua davana anina kanania, ka oluluva odiaka, "Lau 'eva Paulo ena," ka oluluva odiaka, "Lau 'eva Apolo ena," ka oluluva odiaka, "Lau 'eva Petelo ena," ka oluluva odiaka "Lau 'eva Keliso ena."

<sup>13</sup> Inoku Keliso 'eva dekovia, una? Paulo oi daimuiai au ido'o valaukuna akanai deaku bala, una? 'O Paulo vanai oi vaidi'u kabukabu oi oabia, una?

<sup>14</sup> Dilava avanama'inala 'olana lau oi sia ka avaidi'umui kabukabu, beia Kilisupo mai Kaio mo avaidi'uta kabukabu.

<sup>15</sup> Kanaua 'ounai sia kau ka bodiaka oni 'eva lau va'uai oidi'u kabukabu.

<sup>16</sup> 'O momo'ai, Setefano mai ena luma kauta vaka avaidi'uta kabukabu, beia mulinai sia aik-abasi kau ka avaidi'ua kabukabu 'o asi'i.

<sup>17</sup> Keliso esini'u 'eva sia vaidi'u kabukabu 'ounai beia vali nama'ina bailolo vaia, inoku kau ena aoneka luvanai sia bailolo, 'olana Keliso ena ba au ido'o valaukuna akanai siavuna asi'i emaole makauna.

*Keliso 'Eva Dilava Ena Siavu  
Mai Ena Aoneka.*

<sup>18</sup> Keliso au ido'o valaukuna akanai ena ba valina idumeai deba kauta kevatai 'eva bo'o luvanai eao, beia kanaua 'eva Dilava ena siavu ita evamaulita kauta etai.

<sup>19</sup> Puka kabukabunai 'ani ilelena,  
“Aoneka kauta eta aoneka  
bavaolea, mai idiba kauta  
eta idiba 'eva dava asi'iai bavaaoa.”

Isa 29.14

<sup>20</sup> Inoku aoneka kauna 'eva a'ia'i? Malele kave'i kauna 'eva a'ia'i? Melala kanania'i luva ei-dibavaia kauna 'eva a'ia'i? Dilava eta'u kanobata kauta eta idiba 'eva bo'oai evaoa.

<sup>21</sup> Inoku Dilava ena aoneka 'eva kanania boina, kanobata kauta eta aoneka ai 'eva Dilava sia beik-abasia, beia Dilava ena lalonama 'eva ilolo luvana bo'o luvanai devaaoa kanaua beabivenia kauta 'eva bevamaulita.

<sup>22</sup> Iuda kauta eta ula 'eva koa namata be'ika inoku Dilava bevamomo'aia, mai 'Elene kauta 'eva aoneka dekavuia.

<sup>23</sup> Beia lai 'eva Keliso au ido'o valaukuna akanai eba valina lai ailolo vaia, kanaua 'eva Iuda kauta evaakuaku leata mai pulu edea kauta kevatai 'eva bo'o lalovainai devaaoa.

24 Beia Iuda kauta 'o sia Iuda kauta vilootai Dilava e'aeta kauta kataua etai Keliso 'eva Dilava ena siavu mai Dilava ena aoneka.

25 Dilava ena lalovai kanaua bo'oai devaaoa lalovaina eta'u kau eta aoneka ekeinina, maivaka Dilava kevanai badebade davanai devaaoa davana eta'u kau ena kula'ila ekeinina.

26 Bo'akala'u e, oi kau a boimui ai Dilava e'aemui kanaua bolalovaia, kau eta ikaikai 'eva dounamo sia oi oaoneka, dounamo sia oi okula'ila, maivaka dounamo loviai sia oi opulu.

27 Beia Dilava eta'u kanobata kauta oi bo'o kaumui ai devaaomui kaumui edilamui aoneka kauta bevamalalaita, mai oi badebade kaumui ai devaaomui kaumui edilamui kula'ila kauta bevamalalaita.

28 Dilava eta'u kanobata kauta kau kataua deikata 'iu'iu, sia devakuta mai kevata dava asi'i ai devaaota kauta edilata, kau kataua kanobata kauta kau namatai devaota kauta bevasi'avanata.

29 Kanaua 'ounai kau ka Dilava vailanai be'apa 'abuna asi'i.

30 Beia oi 'eva Dilava evuamui easi Keliso Iesu ita evaka'onamomui. Keliso 'eva Dilava enai easi eta aonekai eao, inoku ia kaunai 'eva kakomolo, kakabukabu mai si'avana 'abunai evamaulita.

31 Kanaua 'ounai Puka kabukabunai 'ani ilelena, "E'apa kauna 'eva Lovia namana emaapavaia."

Iel 9.24

## 2

### *Paulo Keliso Au Ido'o Valaukunai Eba Lovana Eakuia.*

1 Bo'akala'u e, lau avasi kele'emui Dilava ena luva vuniata ailolo vaita koanai, idiba luvatai mai kau eta aoneka ai sia ailolo.

<sup>2</sup> 'Olana oi ita kamia laloanai lau nua'u avavaia kave'i sia dava ka baikabasia beia Iesu Keliso mai ena ba au ido'o valaukuna ai davana mo baikabasia.

<sup>3</sup> Lau avasi na'i kamia laloanai maibadebade'u mai maimakau'u mai mai'ululu 'ululu'u.

<sup>4</sup> E'u luva mai e'u ilolo 'eva sia kau ena aonekai mai vasiyasi luvatai, beia Idume Kabukabuna ena siavuai aluvaluva mai ailolo.

<sup>5</sup> 'Olana oi emui abiveni 'eva kau eta aonekai sia belava 'au, beia Dilava ena siavu ai belava 'au.

*Dilava Ena Aoneka.*

<sup>6</sup> Beia abiveniai dekula'ila kauta kevatai 'eva aoneka luvata lai ailolo vaita. Aonekana kanaua 'eva sia kanobata kanania ena 'o kanobata de'ola vaia kauta eta, 'ola kauta katania 'eva eta siavu be'ole.

<sup>7</sup> Beia lai 'eva Dilava ena aoneka kau kevatai evuni aonekana kanaua lai a'oua, inoku kanobata asido'o epulu laloanai Dilava 'eva aoneka kanaua 'ani eva'olua ita eta nuaviai be'ao.

<sup>8</sup> Aoneka kanaua 'eva kanobata de'ola vaia kauta sia deikabasia, bemaikabasia koanai Dilava ena nuaviai emimia Loviana namana au ido'o valaukuna akanai sia bemaaku bala.

<sup>9</sup> Puka kabukabunai ilelena boina,

“Bepupulu davana kanaua

Sia kau ka eikaia,

'o 'uluna sia eika,

'o sia kau ka elalovaia

Dilava 'ani eva'olua ia

delalo'au venia kauta kataua eta.”

Isa 64.4

<sup>10</sup> Beia Dilava 'eva Idumena Kabukabunai dava vuniana kanaua ita kevatai evala'asia. Idume Kabukabuna 'eva dava boutai ekakavu 'ounai Dilava ena lalovai vuniata vaka bevaikata.

<sup>11</sup> Kau ka kau edeana ka ena lalovai sia eikabasia, ia sibona idumena etata'u ena lalovai boutai eikabasita. Vitaitana Dilava Idumena 'eva Dilava ena lalovai boutai eikabasita.

<sup>12</sup> Ita 'eva kanobata idumena ena lalovai sia kabita, beia Idume Kabukabuna Dilava enai easi Idumena kanaua kabia, kanaua 'ounai Dilava ena vilalo koana evenita davata boutai ekaikabasita.

<sup>13</sup> Lai a'oulai luvata katania 'eva sia kau ena aoneka ai devaikabasimai luvata lai aluva vai, beia luva kataua 'eva Idume Kabukabuna evaikabasimai luvata lai aluva vai. Kau davata idumeta Idume Kabukabuna deabia kauta kevatai lai aluva vaita.

<sup>14</sup> Kau nuanai Idume Kabukabuna asi'i kauna Dilava Idumena Kabukabuna enai de'asi davata boutai sia eabita dae, dava kataua ia kevanai 'eva bo'o davatai evaota, maivaka ovota sia e'ovo, 'olana kataua 'eva Idumeai mo ekaikabasita.

<sup>15</sup> Kau nuanai Idume Kabukabuna emimia kauna 'eva dava boutai anita beikabasi, beia kau ka nuanai Idume Kabukabuna asi'i kauna 'eva kau kanaua nuanai Idume Kabukabuna emimia kauna ena mauli ovona sia be'ovo.

<sup>16</sup> Puka kabukabunai ilelena boina,  
 “Dai Lovia namana ena lalovai eikabasi koanai ia  
 betata'u

Lovia namana vaidiba bevenia?”

Isa 40.13

Beia ita 'eva Keliso ena lalovai 'ani kabia.

### 3

#### *Va'alama Dilava Ena Lo'e Laloanai.*

<sup>1</sup> Bo'akala'u e, kau Idume Kabukabunai devonu kauta kataua kevatai aluva boina 'eva oi kevamuiai sia baluva vai, beia oi 'eva kanobata

kanania kaumui boinai a'oumui, itani melo 'oma'omana Keliso laloanai boina.

<sup>2</sup> Oi vaikabasi avenimui 'eva vitaitana bae boina kanaua'i avanimui beia sia bokama pasisitai, 'olana oi 'eva bokama kanaua ianinai asido'o oi okula'ila, vali'u vaka oi boania 'eva sia bedaia.

<sup>3</sup> 'Olana oi kaumui 'eva kanobata kauta eta mia ai oi omimia do'o, oi viloamui mai viala demimia, inoku koakoa katania'i oi 'eva kanobata enai oi o'ao, ena mia vitaitanai oi omimia.

<sup>4</sup> Oi viloamui ka odiaka, "Lau 'eva Paulo mulinai adada'a," ka oluluva odiaka "Lau 'eva Apolo mulinai adada'a." Inoku oi 'eva kanobata kauta eta koakoa oi ovavai.

<sup>5</sup> Inoku Apolo 'eva dai, mai Paulo vaka dai? Lai 'eva Dilava da'alana lai a'abi kaumai, lai emai vinalai 'eva oi ota'u Dilava oi oabivenia, lai ka ka 'eva Lovia namana vinala evenimai vinalana mo lai avavaia.

<sup>6</sup> Lau 'eva kea avadoia, Apolo 'eva veiai esisia, beia Dilava eta'u kea evakubua.

<sup>7</sup> Inoku vadovado kauna mai sisisisi kauna 'eva sia ekaabitaisi, beia Dilava mo ekabia isi 'olana ia etata'u dava kataua evakubuta.

<sup>8</sup> Vadovado kauna mai sisisisi kauna eta vinala 'eva sia dedeana, Dilava betata'u ka ka eta vinala vitaitanai tavata bevenita.

<sup>9</sup> Lai lalua 'eva Dilava ena vinala kaumai, oi 'eva Dilava ena loba maivaka ena luma.

<sup>10</sup> Dilava ainama eveni'u vitaitanai lau 'eva luma ivalava kave'ina kaunai ao luma ivalavana abuna 'ani ava'olua, inoku kau vaida 'eva kanaua akanai luma dedaua, beia luma bedaua 'eva a bedaua koma lalovaina belalovaia kave'i makava.

<sup>11</sup> 'Olana Dilava 'ani Iesu Keliso evalavala luma kanaua idauna abunai eao, kanaua 'ounai kau ka luma edeana idauna abuna sia ka bevalavala.



<sup>12</sup> Luma idauna abuna akanai 'eva kau vaidia kolo, siliva 'o bika'a 'amale 'amaletai luma dedaui, beia vaidia 'eva au ai 'o duvu ai 'o ako ai luma dedaui.

<sup>13</sup> Beia kau ka ka eta vinaula koata 'eva lavuai melalana kanaua betata'u bevala'asita, melala kanaua 'eva mai 'alovana be'asi kau boutai eta vinaula beduita mai 'alovai bekovota kau ka ka eta vinaula nama'ita davata bevala'asi.

<sup>14</sup> Luma idauna 'abuna kanaua akanai kau ka ka dava devavai davata 'alovai sia beani palu koanai ia eta vinaula 'eva tavata be'abi.

<sup>15</sup> Beia kau ka ena vinaula kanaua 'alovai bevalo'olo'oa koanai ia 'eva betatabu, beia ia sibona 'eva bemaui vitaitana ia 'eva 'alova laloanai eveau asi.

<sup>16</sup> Oi oikabasi oi 'eva Dilava ena lo'e kabukabuna maivaka Dilava Idumena 'eva oi nuamui ai emimia.

<sup>17</sup> Kau ka Dilava ena lo'e kabukabuna bevasi'avanala koanai Dilava betata'u kau kanaua bevasi'avanala, 'olana Dilava ena lo'e kabukabuna 'eva ekabukabu inoku oi kaumui katana 'eva lo'e kabukabuna kanaua.

<sup>18</sup> Sibomui sia olebamui. Viloamui ai kau ka elalovaia ia 'eva eidiba vaika kanobata kanania maulina laloanai koanai, ia 'eva sibona bo'o kounai bevaoa, vakaia ia 'eva idiba kauna umaunai be'ao.

<sup>19</sup> 'Olana kanobata kanania aonekana 'eva Dilava vailanai bo'o aonekana. Puka kabukabunai kanania deleleia koma, "Dilava eta'u sibota delalovaia deaoneka kauta eta aoneka evaviuta."

Iob 5.13

<sup>20</sup> Mai vaka ediaka,  
"Lovia namana 'eva eikabasi  
aoneka kauta eta lalovai

'eva anita asi'i.”

Sal 94.11

<sup>21</sup> Kanaua 'ounai kau ka sia eka apa vaia. Dava boutai 'eva oi emui.

<sup>22</sup> Paulo 'o Apolo 'o Petelo, mai kanobata kanania 'o mauli 'o ba, mai vali'u depupulu davata 'o vailai bepupulu davata, boutai 'eva oi emui,

<sup>23</sup> inoku oi 'eva Keliso nuanai oi omimia, Keliso 'eva Dilava nuanai emimia.

## 4

### *Keliso Ena Veaneke Kauta.*

<sup>1</sup> Kanaua 'ounai kau 'eva lai Keliso ena vinaula kaumai mai Dilava ena lalovai luvata vuniata i'imata kaumai ai bevaomai.

<sup>2</sup> Vinaula kanaua boina i'imana kauna 'eva 'ola kauna ia bevamomo'aia ena vinaula bevavai kave'i mai nuana bounai.

<sup>3</sup> Beia vali'u oi 'o kau ka lavuai 'abunai be mane'eu 'eva sia alalovaia namana, maivaka lau sibo'u vaka lavuai 'abunai sia ane'e'u.

<sup>4</sup> Lau sibo'u va'evai sia ane'e'u divo, beia koakoa kanaua 'eva lau sia evakomolo'u, Lovia namana mo sibona lau belavuai'u.

<sup>5</sup> Kanaua 'ounai lavuai melalana asido'o e'asi laloanai sia kau ka lavuai ai oi bone'ea divo oi bovi'ima beda'amo Lovia namana be'asi, inoku ia betata'u vabuto'oai devuni davata kataua 'ailalai bevala'asita, maivaka kau nuatai devunita davata bevala'asita. Inoku melala kanaua'i kau ka ka Dilava kevanai vanama'ina luvana beabia.

<sup>6</sup> Bo'akala'u e, oi daimuiai lau mai Apolo ita ivavitaitamai ai luva katania a'oulai, 'olana lai kevamai ai “Puka kabukabunai deleleia luvana akanai sia oi bokeini” luvana anina oi boikabasia kave'i, sia kau ka oi boapavaia mai sia kau ka oi bovasi'avanala.

7 Dai eta'u vaida viloatai oi evanamamui? Maivaka dava kanana oi oabia davana Dilava sia evenimui davana ka, una? Dava kanaua oi oabia davana Dilava evenimui koanai dava 'ounai oi o'apa?

8 Oi olalovaia oi oula veni davata boutai 'ani oi oabi? Oi olalovaia oi kaumui kevamui ai dava 'ani doutamo? Oi olalovaia oi 'eva 'ani lovia kaumui ai oi oao beia lai 'eva asi'i? Lau alalovaia oi bomalovia umauna 'eva bemanama'ina, inoku lai oi ita kamalovia ka'ona.

9 Beia lau alalovaia Dilava eta'u ena veauneke kaumai 'eva muli umaunai ene'ema divo, vitaitana si'avana kauta kataua kau mato vailatai beaku bata. Lai 'eva vaika vaika davatai lai ba'ao kanobata itoina laloanai kau mai anelu boutai bealulumai.

10 Oi olalovaia Keliso dainai lai 'eva bo'o kaumai ai lai a'ao, beia oi 'eva Keliso laloanai oi oaoneka. Oi olalovaia lai 'eva abadebade, beia oi 'eva okula'ila, oi 'eva 'olamui de'aku, beia lai 'eva 'olamai sia de'aku.

11 Melala boutai laloatai lai 'eva vikolo deakumai, 'atomai delada, emai tubu'a asi'i, deakumai, emai mia 'abuta asi'i lai alu 'avaea alu 'avaea easi mo vali'u.

12 Lai 'eva sibomai kula'ilamai umaunai lai amimia. Kau desivada venimai koanai lai avanama'inata, devaivivimai koanai lai avapasisi,

13 vamai deabi si'ata koanai lai 'eva ia lai aluva venita kave'i. Lai 'eva vitaitana kanobata ito'au ito'auna davata mai dava boutai lu'ulu'uta ai devaaomai easi mo vali'u.

14 Lau luva katania aleleta 'eva sia oi bavalalaimui 'ounai, beia oi e'u lalo'au melomui 'ounai avaidibamui oi bolalovai 'inia sia oi bo'apa.

<sup>15</sup> Kevamui ai ivaikabasimui kauta bema-  
outamo vaika Keliso laloanai, beia kamamui 'eva  
sia douta. Beia vali nama'ina ailolo vaia maui oi  
oabia 'ounai lau 'eva kamamui ai ao Keliso Iesu  
laloanai.

<sup>16</sup> Kanaua 'ounai anoimui, lau e'u koakoa vitai-  
tata oi bovavai.

<sup>17</sup> Kanania 'ounai Timoteo asinia evavasi keva-  
mui, ia 'eva lau e'u lalo'au melona mai ena abiveni  
Lovia namana enai. Ia betata'u e'u maui dalana  
Keliso Iesu laloanai amia vaia maulina kanaua  
'abu bounai ada'aia Dilava ena lo'e laloatai avaik-  
abasi vaikabasita oi bevalalovai 'inimui.

<sup>18</sup> Viloamuiiai vaidia 'eva de'apa 'olana delalo-  
vaia lau sia bamue 'udai kele'emui.

<sup>19</sup> Beia Lovia namana be'ula koanai, lau 'eva 'ani  
bavasi kele'emui, inoku lau sibo'u de'apa kauta  
kataua eta siavu davai dava bevavai siavuta baik-  
abasi, beia dava dava de'oulai davata lovata sia  
ba'aku.

<sup>20</sup> Olana Dilava ena lovia vanuana maulina 'eva  
sia luvaluva 'avaeatai, beia mai siavuna emimia.

<sup>21</sup> Oi dava oi oulaveni? Ima'u mai auna bavasi  
bavakomolomui, 'o lalo'au mai manau koakoanai  
bavasi kele'emui?

## 5

### *Kulakula Koana Dilava Ena Lo'e Kauta Viloatai Epulu.*

<sup>1</sup> Vali'u emui koakoa 'eva valina 'ani aika oi  
viloamuiiai kulakula koana epupulu kau ka  
kamana adana ivaluana ita denoka'ona, inoku  
koakoa kanaua 'eva koakoa si'avana vaika  
mulimuli kauta vaka kanaua sia devavai koma.

<sup>2</sup> Beia oi 'eva oi o'apa mo, ia sia oi okakani,  
kau ka viloamuiiai kanaua evavai koma

kauna ivala'asina lovana oi bomaaku 'eva bemanama'ina.

<sup>3</sup> Lau oi viloamuiyai asi'i, beia idumeai lalovai lalovaiyai lau 'eva oi kevamuiyai, inoku koakoa kanaua evavaia kauna 'eva mekau avenia vitaitana itani lau 'eva na'i kevamuiyai boina.

<sup>4</sup> Eta Lovia namana Iesu vanai oi bododo'u koanai lau vaka idumeai 'eva na'i oi ita, inoku eta Lovia namana Iesu ena siavu bevala'asia ita kevatai,

<sup>5</sup> inoku kau kanaua 'eva Satani ekavenia, ia kauanina si'avana vaika kanaua 'eva bevasi'avanala inoku idumena 'eva bemaui Lovia namana ena asi melalanai.

<sup>6</sup> Oi o'apa 'eva sia ekomolo, oi 'ani oikabasi vakubu mulamulana kava'inamo betata'u palaoa itoina bevakubua vitaitana si'avana kikina betata'u maui itoina bevasi'avanala.

<sup>7</sup> Oi vakubu mulamulana 'ana'ina itani si'avana boina kanaua oi boitoa'au koanai oi 'eva palaoa makamakana laloanai sia mai vakubu mulamulana palaoana ai oi bo'ao. 'Olana Keliso ita eta La'aukeini naduna mamoea eta si'avana iabita ovo daitai deaku bala, kanaua 'ounai oi 'eva nuamui ai sia vakubu mulamulana kaumuiyai oi oao.

<sup>8</sup> Kanaua 'ounai ita eta La'aukeini naduna ekavavaia palaoana laloanai 'eva sia mai vakubu mulamulana, 'olana vakubu mulamulana 'ana'ina 'eva si'avana mai koakoa si'avata vaika evenita, beia palaoa kanaua laloanai vakubu mulamulana asi'i 'eva lalovai komolo mai luva umauna palaoana.

<sup>9</sup> E'u malele kanaua aleleia malelena laloanai 'ani a'oumui, kulakula kauta ita sia oi boyaka'onamo.

<sup>10</sup> Lau sia adiaka kanobata kauta katania dekulakula, deidono, devinao, mai dilava dedeta

dekukudivo venita kauta ita sia oi bovaka'onamo. Kevatai oi bopopode koanai oi 'eva kanobata kanania oi bovikania oi bobaba.

<sup>11</sup> Lau oi alele venimui adiaka, oi viloamui ai kau ka sibona ediaka, ia 'eva abiveni kauna beia eku-lakula, eidono, dilava dedeta ekukudivo venita, eluva si'asi'a, einu ba, mai evinao, kau kanaua boina kauna ita sia oi boaniani ka'ona kovo.

<sup>12</sup> Mulimuliai demimia kauta sia bavaluvata 'olana kanaua 'eva sia lau e'u vinaula. Beia oi emui vinaula 'eva Dilava ena lo'e laloanai demimia kauta oi bovaluvata.

<sup>13</sup> Dilava betata'u mulimuliai demimia kauta bevaluvata. Puka kabukabunai eluva ediaka, "Si'avana kauna 'eva viloamui ai oi bovala'asia."

## 6

### *Banota Sia Ekavaluvata Mulimuli Kauta Vailatai.*

<sup>1</sup> Oi abiveni kaumui viloamui ai kau ka bo'akalana ita deadedua koanai, dava 'ounai evuala edada'a mulimuli kauta vailatai devaluvala? Ia dava 'ounai sia evuala edada'a abiveni kauta kevatai devakomoloa?

<sup>2</sup> Oi 'ani oikabasi Dilava ena kau 'eva kanobata kauta bevaluvata, inoku oi kanobata kauta oi bo-valuvata kaumui dava 'ounai adedua kikita vaid a viloamui ai 'eva sia oi ovakomolota?

<sup>3</sup> Oi 'ani oikabasi vailai ita 'eva anelu ekavalu-vata. Kanaua 'ounai luva umauna mauli kanania davata ekavakomolota 'eva bedaia.

<sup>4</sup> Adedua kataua boita kevamui ai depupulu koanai dava 'ounai oi ovuata odada'a valuva kauta Dilava ena lo'eai vata asi'i kataua kele'eta?

<sup>5</sup> Lau kanania aluva koma 'olana 'eva oi malalai koakoata oi ovavai, na'i oi viloamui ai aoneka

kauna ka emimia koanai, ia bemata'u abiveni kauta katana bemavakomolota.

<sup>6</sup> Beia abiveni kauna ka etata'u banona evai-vivia inoku evuala edada'a lavuai 'abuna, oi 'eva mulimuli kauta vailatai kanaua oi ovavai koma.

<sup>7</sup> Kanaua 'ounai oi abiveni kaumui viloamuiiai adedua kanaua boina oi ovavaia koanai boumuiiai 'ani oi o'eko. Luvana asi'i, devava'evamui 'o debamui beia oi bomavapasisi 'eva bemanama'ina.

<sup>8</sup> Beia bo'akalamui kevatai oi ova'eva, oi olebata, mai oi ovavai si'asi'a 'eva sia enama'ina.

<sup>9</sup> Oi 'ani oikabasi si'avana kauta 'eva Dilava ena lovia vanuanai sia bedododo. Ia asi'i demalebamui, kulakula kauta kataua, dilava dedeta dekuku divo venita kauta, kau adata dekulata kauta, mai momoluane lua dekulakula, 'a'ate lua dekulakula 'a'ateta,

<sup>10</sup> vinao kauta, idono kauta, inu ba kauta, luva si'asi'a kauta, abi'avaea kauta, kataua boutai 'eva sia ka Dilava ena lovia vanuanai bedodo kovo.

<sup>11</sup> Oi vaida vaka 'ana'inai kanaua boimui, beia vali'u 'eva Lovia namana Iesu Keliso vanai mai eta Dilava Idumenai emui si'avana 'ani edeinita ovo, 'ani evakabukabumui, maivaka 'ani komolo evenimui.

### *Kauanimui 'Eva Dilava Ivanuavina Vinaulana Oi Bovavaia.*

<sup>12</sup> Kau ka beluluva bediaka, “Lau dava boutai bavavai 'eva bedaia,” luva umauna, beia boutai 'eva sia denama'ina kevamuiiai. “Dava boutai bavavai 'eva bedaia,” beia kataua ka 'eva lau e'u mau si'asi'a be'ola vaia.

<sup>13</sup> Bokama 'eva bo'a ena, mai bo'a 'eva bokama beabia. Kanaua 'eva luva umauna, beia Dilava betata'u luana bevaoleta. Kauanita 'eva kulakula davanai sia be'ao, 'olana kauanita 'eva Lovia

namana ena, mai Lovia namana 'eva kauanita be'imala kauna.

<sup>14</sup> Dilava eta'u ena siavu'ai Lovia namana Iesu bai evako'isia 'udai, vitaitanai ita vaka siavu kanaua'i bevako'isita.

<sup>15</sup> Luva umauna oi oikabasia oi ka ka kauanimui 'eva Keliso kauanina le'eta oi ovaka'onamo kauani ka'onamoai oi o'ao. Inoku lau sia batata'u Keliso kauanina le'ena ka babia bada'a kulakula ateatena ita bavaka'onamo. Asi'i vaika.

<sup>16</sup> Oi oikabasi kau ka kulakula ateatena ita devaka'onamo 'eva lalua'na kauani ka'onamo, 'olana Puka kabukabuna laloanai kanania deleleia koma, "Lua devaka'onamo 'eva kauani ka'onamo."

<sup>17</sup> Beia kau ka Lovia namana ita devaka'onamo kauna 'eva lalua'na idumeai deka'onamo.

<sup>18</sup> Kulakula kevanai oi boda'a tau, 'olana kau ka si'avana edeata edeata boutai evavai 'eva ia sibona kauanina sia evasi'avanala, beia kulakulai 'eva sibona kauanina evasi'avanala.

<sup>19</sup> Oi 'ani oikabasi kauanimui 'eva Idume Kabukabuna ena lo'e kabukabuna, ia 'eva oi laloamui'ai emimia, Dilava eta'u Idume Kabukabuna evenimui. Kanaua 'ounai oi sibomui sia oi bo'ola vaimui.

<sup>20</sup> 'Olana Dilava 'eva 'ani tava namanai etavamui. Kanaua 'ounai kauanimui'ai oi bovavai davata boutai laloatai 'eva Dilava nuavina oi bovala'asia.

## 7

### *Kamoane Luvaluvana.*

<sup>1</sup> Vali'u dava kataua emui maleleai oi olavu'ai lavuai vai lavuaita tavata avamueta. Kau sia bemanamoane 'eva bemanama'ina.

<sup>2</sup> Beia kulakula 'avaea edounamo vaika 'ounai kau 'eva sibona adana umauna kevanai bemimia,



maivaka ateate 'eva sibona adana umauna kevanai bemimia.

<sup>3</sup> Kau betata'u adana ia kevanai ena kamoane koana bevavaia, vitaitana mo ateate vaka betata'u ia adana kevanai ena kamoane koana bevavaia.

<sup>4</sup> Ateate 'eva sibona kauanina sia be'ola vaia beia adana betata'u be'ola vaia, vitaitana mo kau sibona kauanina sia be'ola vaia, beia adana betata'u be'ola vaia.

<sup>5</sup> Adamui kevatai kauanimui sia oi bo'oua kao beia lalua nuamui bovaka'onamo oi bo-mia 'avaea melala kava'ina mo, kauanimui bekabukabu meamea dainai, inoku mulinai oi bovaka'onamo 'udai, inoku Satani 'abuna sia oi bokolea asi'i emakovomui, 'olana kauanimui oi bo'imala eva sia bedaia 'ounai.

<sup>6</sup> Lau luva kanania aluvala kevamui 'eva sia talavatu luvana ia vidulu luvana.

<sup>7</sup> Lau e'u ula kau boutai 'eva lau vitaita'uai be-mao sia bemakamoane. Beia Dilava 'eva veniveni ka ka evenita, ka 'eva ena veniveni kanania evenia 'eva sia bekamoane, ka 'eva ena veniveni kanaua evenia 'eva bekamoane.

<sup>8</sup> Vali'u 'eva kau sia dekamoane kauta kataua mai 'a'ateta, obu mai toae a'outa. Sia bekamoane bemia 'avaea lau boi'u 'eva enama'ina.

<sup>9</sup> Beia ia sibota kuanita be'imata kave'i sia bedaita koanai bekamoane. Bekamoane 'eva enama'ina 'olana asi'i kulakula lalovai lalovaina kanaua eta maui ema vasi'avanala.

<sup>10</sup> Oi okamoane kaumui a'oumui, luva kanania 'eva sia lau lele'u beia Lovia namana lenea. Ateate 'eva adata kevatai sia beda'aovo 'avaea.

<sup>11</sup> Eda'aovo ateatena 'eva sia bekamoane, 'o asi'i koanai bemue 'udai beda'a adana kevana. Kau vaka adana sia bevala'asia.

<sup>12</sup> Kalina boumui e, kanania 'eva sia Lovia namana ena luva beia lau oi vailamui aluvala.

Abiveni kauna ka 'eva sia eabiveni ateatena eadavala, inoku ateate kanaua e'ula adana ita bemimia koanai, kau kanaua adana sia bevala'asia.

<sup>13</sup> Abiveni ateatena ka sia eabiveni kauna eadavala, inoku kau kanaua e'ula adana ita bemimia koanai, ateate kanaua adana sia bevala'asia.

<sup>14</sup> Sia eabiveni kauna adana abiveni ateatena ita devaka'onamo 'ounai kau kanaua 'ani ekabukabu, mai sia eabiveni ateatena adana abiveni kauna ita devaka'onamo 'ounai ia 'ani ekabukabu. Beia kanaua sia bemako koanai, nakumui 'eva bema'obu Dilava vailanai, beia koa kanaua 'ounai nakumui 'eva 'ani dekabukabu.

<sup>15</sup> Beia sia eabiveni kauna 'o ateatena e'ula adana abiveni ateatena 'o kauna bevikania koanai sia oi bo'alavua, koa katania boita laloatai abiveni kauna 'o ateatena vuona sia bekoala. Dilava 'eva ita e'aeta nua'eluai ekamia.

<sup>16</sup> Abiveni ateatemu e, oni sia oikabasi adamu ama'i oni daimuai mauli beabia, maivaka abiveni kaumu e, oni sia oikabasi adamu ama'i oni daimuai mauli beabia.

*Oni A Boimuai Dilava E'aemu  
'Eva Kanaua Boimu Bomimia.*

<sup>17</sup> Kau ka ka Lovia namana ia evenia maulina vitaitanai bemimia, maivaka ka ka Dilava e'aeta maulina vitaitanai bemimia. Talavatu luvana kanania 'eva Dilava ena lo'e kauta boutai kevatai avaikabasi vaia.

<sup>18</sup> 'Ani deivaia kauna Dilava ena 'ae'ae eabia dae koanai ena iva sia bevunia, beia sia deivaia kauna Dilava ena 'ae'ae eabia dae koanai beivala lalovaina sia belalovaia.

<sup>19</sup> Deivala 'o sia deivala 'eva sia dava namana. Beia dava namana 'eva Dilava ena talavatu mo ekada'a vaia kave'i.

<sup>20</sup> Kau ka ka mauili kanaua demia vaia laloanai Dilava e'aeta vitaitanaimo bemimia.

<sup>21</sup> Oni da'alabi kaumu laloanai Dilava e'aemu koanai, nuamu sia bebavunu, beia melala edeana kai bevala'asimu 'avaea koanai boabia dae.

<sup>22</sup> Da'alabi kauna Lovia namana eta'u e'aeia kanaua 'eva sia da'alabi kauna Lovia namana laloanai. Vitaitana mo, kau da'ala sia e'abi kauna kanaua Keliso eta'u e'aeia 'eva Keliso ena da'ala iabina kauna.

<sup>23</sup> Oi 'eva Dilava 'ani tavamui namanai etavamui, 'ounai oi 'eva sia kau eta da'ala abi kaumui ai oi bo'ao.

<sup>24</sup> Bo'akala'u e, ka ka mauili kanaua oi omia vaia laloanai e'aemui vitaitanai kanaua boimui Dilava ita oi bomimia.

### *Sia Dekamoane Kauta Luvata.*

<sup>25</sup> Vali'u sia dekamooane kauta luvana 'eva kania. Sia Lovia namana ena luva ia lau e'u luva oi emui ai aluvala. Beia Lovia namana ena vilaloai lalovai komolo eveni'u 'ounai oi bovamomo'ai'u.

<sup>26</sup> Vali'u 'eva adedua melalata, kanaua 'ounai lau alalovaia oi a omia koma kanaua boinai mo oi bomimia 'eva benama'ina.

<sup>27</sup> Okamoane kaumu adamu sia bovala'asia, beia sia okamoane kaumu 'eva kamoane sia bolalovaia.

<sup>28</sup> Beia bokamoane koanai oni si'avana sia ovavaia, maivaka vato makamaka bekamoane koanai ia si'avana sia evavaia. Beia kamoane kauta 'eva bavunu doutamo bedavalita eta mauilai, kanaua 'ounai avalalounemui.

<sup>29</sup> Bo'akala'u e, kanania aluva koma, melala to'ona 'eva 'ani be'asi, inoku vali'u beda'amo vaila melalatai dekamooane kauta bemimia itani sia dekamooane boina Dilava ena vinaula bevavaia.

<sup>30</sup> Dala vitaitanai, dekakani kauta kataua bemimia itani nuata sia devilalo boina. Delalonama kauta bemimia itani sia delalonama. Detavatava kauta dava kataua detavata 'eva lovata sia be'aku itani sia ia eta.

<sup>31</sup> Mai kau kataua vali'u kanobata davata doutamo devinaula vaita kauta 'eva belalovaia itani vinaula kataua 'eva kevatai dava asi'i boina. 'Olana kanobata kanania mai vali'u kamia vaia maulina 'eva 'ani beole.

<sup>32</sup> Lau e'u ula 'eva oi nuamui sia beavunu. Sia ekamoane kauna 'eva Lovia namana mo ena vinaula evavaia, ena lalovai boutai 'eva Lovia namana lalona bevanama.

<sup>33</sup> Beia ekamoane kauna 'eva kanobata mo davata elalovaita, 'olana ena ula 'eva adana lalona bevanama.

<sup>34</sup> Maivaka ena lalovai 'eva evaluala adana lalona bevanama mai Lovia namana lalona bevanama. Beia sia ekamoane ateatena 'o vatona 'eva Lovia namana ena vinaula mo elalovaia, 'olana kauaniai mai idumeai bekabukabu. Beia ekamoane ateatena 'eva kanobata davata elalovaita, 'olana ena ula 'eva adana lalona bevanama.

<sup>35</sup> Lau kanania aluva koma 'olana 'eva oi emui nama'ina 'ounai, beia sia atalavatumui. Lau a'ula oi 'eva mauli komolonai oi bomauli, Lovia namana ena vinaula oi ovavaia koanai nuamui sia belulua.

<sup>36</sup> Kau ka nuanai elalovaia nakuna vatona enai sia evavai kave'i 'ani emia keini, beia kau kanaua ena ula nakuna vatona bemakamoane koanai dala bevakavu bevakamoane, kanaua 'eva si'avana sia evavaia.

<sup>37</sup> Beia kau kanaua sibona nuana evavaia kave'i maivaka nuana evapasisia nakuna vatona sia bekamoane, inoku sia evakamoane vaka ekomolo.

<sup>38</sup> Inoku kau kanaua nakuna vatona evakamoanea 'eva ekomolo, beia kau kanaua nakuna vatona sia evakamoanea 'eva evavai kave'i vaika.

<sup>39</sup> Ateate 'eva melala boutai adana dainai be-dadai eta miai. Beia adana bebaba koanai, ia 'eva 'ani ateate 'avaeana, inoku be'ula bekamoane koanai abiveni kauna beadavala Lovia namana laloanai.

<sup>40</sup> Beia e'u lalovai 'eva kanania boina, obu kanaua sia bekamoane 'eva belalonama si'asi'a. Lau alalovaia Lovia namana Idumena 'eva lau nua'uai, 'ounai kanania aluva koma.

## 8

### *Dilava Dedeta Eta Iani Luvaluvana.*

<sup>1</sup> Vali'u kanania 'eva ainama ianita dilava dena devenia luvana. Luva umauna ita kaikabasi, "Ita boutai 'eva mai eta ikabasi." Inoku ikabasi etata'u apa eabia isi, beia lalo'au etata'u abiveni kauta evakula'ilata.

<sup>2</sup> Kau ka sibona elalovaia ia 'eva mai ena ikabasi dava vaida eikabasita, beia bemaikabasita dokadoka davata 'eva sia eikabasita.

<sup>3</sup> Beia kau ka Dilava elalo'au venia kauna 'eva Dilava vaka kau kanaua eikabasia.

<sup>4</sup> Kanaua 'ounai ainama ianita dilava dedeta devenita inoku ka'ani luvata 'eva katania. Ita kaikabasi dilava dedeta 'eva sia dilava umauta kanobata kanania laloanai, kaikabasi Dilava umauna 'eva ka'onamo mo.

<sup>5</sup> Kau deta'u dilavai devaota kauta vaida vutu-vutu mai kanobatai, (inoku 'dilavata' mai 'loviata' katania 'eva doutamo.)

<sup>6</sup> Beia ita 'eva mai eta Dilava ka'onamo, Kamata. Ia 'eva dava boutai evavaita, inoku ia dainai kamimia. Maivaka Lovia namana 'eva ka'onamo

Iesu Keliso. Ia dainai dava boutai depupulu, inoku ia dainai ita kamimia.

<sup>7</sup> Beia abiveni kauta vaidā luva umauna kanania sia deikabasia. Vali'u melala kanania'i vaidā 'eva dilava dedeta eta vinaula 'ani demadanata kave'i 'ounai iani kataua boita de'ani koanai ia delalovaia kanaua 'eva dilava dedeta eta, eta lalovai lalovaiai nuata sia dekomolo, delalovaia iani kanaua deania ianina 'ani eva'obuta Dilava vailanai.

<sup>8</sup> Iani 'eva sia bevuata beda'a Dilava kevana, sia eka aniani beia Dilava vailanai ena si'avanana asi'i 'o eka aniani Dilava vailanai vaka ena nama'inana asi'i.

<sup>9</sup> Beia oi bo'imamui kave'i, 'olana emui ikabasiai oi oaniani, kanaua betata'u eta abiveni ebadebade kauta asi'i emava'ekota si'avana laloanai.

<sup>10</sup> 'Olana kau ka ena abiveni ebadebade kauna oni idiba kaumu dilava dedena ena vakai oaniani beikamu koanai, ia nuana ovakula'ilala ena lalovai beva'eva inoku dilava dedeta eta iani be'ani.

<sup>11</sup> Inoku Keliso bo'akalamu ena abiveni ebadebade kauna kanaua dainai eba 'eva oni emu idiba kanaua betata'u ia idumena bevasi'avanala.

<sup>12</sup> Oni emu vavai kanaua'i bo'akalamu nuana oabi si'ala ia elalovaia esi'avana koakoana bevavaia, inoku oni bo'akalamu kevanai 'eva ova'eva maivaka Keliso kevanai 'eva ova'eva.

<sup>13</sup> Kanaua 'ounai iani kanaua etata'u bo'akala'u eva'ekoa koanai, lau iani kanaua sia bania 'udai 'olana asi'i amava'ekoa.

## 9

*Paulo Vali Nama'ina Dainai  
Tavana Sia Ekavu.*

<sup>1</sup> Lau 'eva sia da'ala iabina kau'u. Lau 'eva veauneke kau'u. Lau eta Lovia namana Iesu

aikaia. Oi 'eva Lovia namana ena vinaula avavaia vinaulana vuavuana kaumui.

<sup>2</sup> Kau vaidia etai lau 'eva sia veauneke kau'u, beia oi emuai lau 'eva veauneke kau'u, 'olana oi Lovia namana oi oabivenia kauna etau evamomo'aia lau 'eva veauneke kau'u.

<sup>3</sup> De'ouabi'u kauta eta luva kanania bavamue koma.

<sup>4</sup> Lau maie'u komolo e'u vinaula tavana iani mai vei ba'abi.

<sup>5</sup> Veauneke kauta vaidia mai Lovia namana kadina mai Petelo devavai vitaitata bamavavai, maie'u komolo ada'u abiveni ateatena e'u da'a to'ato'a laloatai bamavada'aia.

<sup>6</sup> Banomai vaidia sia bevinaula beia lau Banaba ita 'eva sibomai emai iani vinaulana lai bavavaia, una?

<sup>7</sup> Kualikauna davana sibona ena vinaula tavana beveveni? Vinaula kauna davana sibona ena loba ianina sia be'ani? Mamoe vanani kauna davana ena mamoe baena sia be'inu?

<sup>8</sup> Lau melala boutai ka'ika luvata ivavitaitatai mo sia aluvaluva, Dilava ena talavatu vaka luva vitaitana eluvala.

<sup>9</sup> Mose ena talavatu pukanai kanania eleleia koma,

“Bolomakau witi ivamukamukana vinaulana evavaia laloanai nutuna sia bodo'oa avu beia bovikania beaniani.”

Deu 25.4

Luva kanaua 'eva Dilava bolomakau elalovaita vaika 'ounai, una? Asi'i.

<sup>10</sup> Kanaua eluvaia 'eva ita e'outa. Luva umauna luva kanaua 'eva ita daitai kanaua deleleia koma. Eyovoi kauna mai e'ua'ua kauna ia lalua ena vinaula devavaia vinaulana vuavuana denuabata venia 'eva beabia.

<sup>11</sup> Lai 'eva idume ena kea lai avadoa oi kevamuiai, inoku kauani ivanama'inana davata kevamuiai lai ba'abi 'eva sia ekomolo, una?

<sup>12</sup> Bema vaida vidulu oi ovenita 'eva mai eta komolo koanai, lai vaka emai komoloai vidulu namana kevamuiai lai babia.

Beia lai kanaua boina sia lai avavaia. Ia lai 'eva dava boutai kevatai lai avapasisi 'olana Keliso ena vali nama'ina asi'i lai ama'alavuia makauna.

<sup>13</sup> Oi 'ani oi oikabasi lo'e kabukabunai devinaula kauta eta iani ua'i lo'e kabukabunai de'abi, maivaka vala kabukabunai devidulu kauta ainama ianina ua'i dekoalea.

<sup>14</sup> Inoku dala vitaitanai mo Lovia namana eluva ediaka vali nama'ina deilolo vaia kauta kataua eta mauili ivanama'inana davata 'eva ua'i vali nama'ina deabia dae kauta kevatai beabia.

<sup>15</sup> Beia lau e'u komolo kanaua'i bamanoimui 'eva vinalana sia avavaia. Mai vali'u alele venimui 'eva sia komolo kataua babita 'ounai. Kau ka bediaka lau e'u apa kanania anina asi'i koanai lau bamaba 'eva bemanama'ina.

<sup>16</sup> Vali nama'ina ailolo vaia dainai ba'apa 'eva sia ekomolo. 'Olana lau ailolo vaia 'eva Lovia namana e'ou'u bavavaia vinalana avavaia. Inoku vali nama'ina sia bailolo vaia koanai kele'euai 'eva besi'avana vaika.

<sup>17</sup> Lau sibo'u e'u ulai vinala kanania bamavavaia koanai tava'u bamakavua, beia Lovia namana ena vinala eveni'u koanai, vinala kanania 'eva Dilava lau eva'olavai'u bavavaia mo.

<sup>18</sup> Inoku tava'u 'eva dava? Vali nama'ina ailolovaia 'avaea tava'u lovana sia akua mai vali nama'ina vinalana avavaia laloanai e'u komolo sia akakavu. Lau tava'u 'eva lalonama katania.

<sup>19</sup> Lau 'eva kau ka da'alana sia a'abi, beia lau sibo'u e'u ulai kau boutai eta da'alabi kau'uai a'ao,



inoku kau doutamo bavuata ba'asi Iesu beabivenia.

<sup>20</sup> Iuda kauta ita lai amimia laloanai lau 'eva Iuda kauta vitaitatai a'ao, inoku ia bavuata ba'asi Iesu beabivenia. (Maivaka lau 'eva Mose ena talavatu venunai sia amimia,) beia talavatu venunai demimia kauta kataua ita lai amimia laloanai lau talavatu venunai demimia kauta vitaitatai a'ao, inoku ia bavuata ba'asi Iesu beabivenia.

<sup>21</sup> Dala vitaitanai Mose ena talavatu sia deikabasia kauta ita lai amimia laloanai lau talavatu sia deikabasia kauta vitaitatai a'ao, inoku talavatu sia deikabasia kauta bavuata ba'asi Iesu beabivenia. (Beia luva umauna lau Dilava ena talavatu sia avikania, lau 'eva Keliso ena talavatu ada'avaia.)

<sup>22</sup> Eta abiveni debadebade kauta kevatai amimia laloanai lau vaka abadebade ia vitaitatai a'ao, inoku vaida bavuata ba'asi Iesu beabivenia. Kanaua 'ounai lau 'eva dava boutai vitaitatai a'ao kau boutai kevatai, inoku dala davana bedaia dalanai vaida bavuata ba'asi vamauli beabia Keliso enai.

<sup>23</sup> Lau dava katania boutai avavaita 'eva vali nama'ina dainai, inoku lau vaka ia ita vanama'inana kanaua lai babia ka'ona.

<sup>24</sup> Oi oikabasi kave'i veau vilo'o laloanai veau kauta doutamo deveau, beia ka'onamo mo 'ana'ia tavana eabia. Kanaua 'ounai oi boveau koanai 'ana'ia veauna oi boveau.

<sup>25</sup> Veau vilo'o laloatai dedododo kauta boutai veau vilo'oai ena vaidiba pasisina deabia. Kanaua devavaia 'eva 'ana'ia tavana sia bemia dau'a kanaua beabia 'ounai, beia ita vinaula kavavaia 'eva 'ana'ia tavana bemia keinikeini kanaua ekabia 'ounai.

<sup>26</sup> Kanaua 'ounai lau 'eva komolo'uai aveau bada'a mo veau to'ona 'abunai bala'asi, maivaka

lau 'eva viaku kauna imana sia ekapo 'avaea kapo 'avaea kauna boina.

<sup>27</sup> Lau sibo'u kau'u avakula'ilala, avapasiswa mai nua'u bada'avaia kave'i, 'olana vaidā kevatai vali nama'ina bailolo vaia mulinai lau asi'i demavasi'avana'u tavana sia amaabia maka'una.

## 10

### *Dilava Dedeta Sia Ekakukudivo Venita.*

<sup>1</sup> Bo'akala'u e, lau a'ula 'ava'avata Mose mulinai dedada'a kauta kevatai dava epulu davana sia oi bobolabolala. Dilava eta'u boutai oli venunai evada'ata inoku 'Atu 'Aolana laloanai dekeini.

<sup>2</sup> Ia boutai oli laloanai mai 'atu laloanai deidi'u kabukabu Mose ibanona kautai deao.

<sup>3</sup> Boutai 'eva iani kanaua Dilava evenita ianina vitaitana mo deani.

<sup>4</sup> Maivaka boutai vei Dilava evenita veina kanaua vitaitana mo deinuia. Dilava ena bika'a kanaua ita deda'a ka'ona, bika'ana kanaua'i vei ealu asi deinu, inoku bika'a kanaua 'eva Keliso.

<sup>5</sup> Koakoa nama'ita kataua evavai, beia doutamo vaika 'eva Dilava lalona sia devanama, kanaua 'ounai kano'akunai deba palu kauanita 'eva 'abu edeata edeatai deno 'avaea'avaea.

<sup>6</sup> Dava katania boutai 'eva ivavitaitana ita eta, bevalalovaita dava si'avata vaika sia ekaulavenita 'avaea ia devavaia vitaitana.

<sup>7</sup> Dilava dedeta 'eva sia oi bokukudivo venita vaidā devavaia boina, 'olana Puka kabukabunai 'ani eleleia, "Kau 'eva demiadivo deaniani deinu inoku deko'isi kau mai 'a'ate ita neva si'avata vaika devavai."

<sup>8</sup> Ita 'eva sia ekakulakula vaika vaidā ua'i devavaia boina, inoku melala ka'onamo laloanai kauta boutai da luanavui koi (23,000) deba.

<sup>9</sup> Ita 'eva Lovia namana sia ekakovoa vaidā ua'i ia dekovōia boina, inoku kau'asi deta'u deala bata.

<sup>10</sup> Maivaka ita sia eka'ou to'ato'a ia de'ou to'ato'a boina, inoku akuaku aneluna eta'u eaku bata.

<sup>11</sup> Dava katania depulu ia kevatai 'eva ivavitaitana ita eta, luvata deleleta 'eva ita ivalalovai inita kanobata to'ona e'asi laloanai.

<sup>12</sup> Inoku oni olalovaia 'ani olava 'ini kave'i koanai, bo'imamu kave'i asi'i oma'eko.

<sup>13</sup> Vikovo oi kevamui depupulu vikovota kataua 'eva kau kevatai depupulu kauta vitaitata. Beia Dilava 'eva lele iyavua venina kauna. Ia sia bevikanimu 'avaea vikovo kanaua emui kula'ila ekeinīa vikovonai asi'i oi oma'eko 'ounai. Inoku vikovo oi oabia koanai, ia dala ka bevenimui oi boda'atau, kanaua'i oi bolava 'ini.

<sup>14</sup> Kanaua 'ounai, e'u lalo'au kaumui e, dilava dedeta ikukudivo venita 'eva oi bovikanita.

<sup>15</sup> Oi 'eva nuakomolo kaumui a'oumui, e'u luvai sibomui vaka oi bolalovaia lau dava a'oua.

<sup>16</sup> 'Ou kanaua Lovia namana ena anido'u laloanai kabia inoku Dilava kavanama'inala 'ouna kainua koanai, ita boutai Keliso lalana kainua ka'ona. Maivaka Palaoa kakovia ka ka ka'ani koanai, ita boutai Keliso kauanina kania ka'ona.

<sup>17</sup> Palaoa 'eva ka'onamo Keliso kauanina, ita 'eva kamato beia kauani 'eva ka'onamo, 'olana ita boutai palaoa kanaua ka'onamo kania ka'ona.

<sup>18</sup> Isalaela kauta eta koakoa ekalalovaia, vala kabukabunai de'abu sisita deani kauta boutai 'eva vala kabukabuna vinalana devavaia ka'ona.

<sup>19</sup> Lau dava ako, ainama davana kanaua dilava dedena devenia davana 'eva mai anina, una? Maivaka dilava dedena 'eva dilava umauna, una?

<sup>20</sup> Asi'i vaika. Pulu edea kauta eta ainama 'eva ka'uba si'avata vaika eta, beia sia Dilava ena. Lau a'ula oi ka'uba si'avata vaika ita sia oi bo-vaka'onamo.

<sup>21</sup> Oi Lovia namana ena 'ouai oi oinuinu kaumui ka'uba si'avata vaika eta 'ouai sia oi boinuinu. Oi Lovia namana ena aniani vakavakanai oi oaniani kaumui ka'uba si'avata vaika eta aniani vakatai sia oi boaniani.

<sup>22</sup> Ita Lovia namana nuana ekavananala 'eva sia enama'ina, 'olana ena badu bevala'asi koanai ita sia mai kula'ilata ia boina.

<sup>23</sup> Oi odiaka “dava boutai ekavavai 'eva bedaia,” beia lau adiaka boutai 'eva sia 'ani benama'ina, oi odiaka “dava boutai ekavavai 'eva bedaia,” beia adiaka boutai 'eva sia 'ani beduluta kave'i eta abiveni laloanai.

<sup>24</sup> Oi sia ka sibona ena nama'ina mo bekavua, beia banona vaida vaka eta nama'ina bekavua.

<sup>25</sup> Tavatava 'abunai detavatava vaita sisita 'eva oi bo'ani, beia sia oi bolavuai lavuai oi bodiaka kanaua 'eva dilava dedena enai deveveni sisina 'o asi'i, nuamui asi'i demabavunu.

<sup>26</sup> 'Olana Puka kabukabuna deleleia boina, “Kanobata mai laloanai demimia davata boutai 'eva Lovia namana ena.”

Sal 24.1

<sup>27</sup> Sia eabiveni kauna ka beveaumu lalua na oi boaniani inoku oni o'ula bodada'a koanai bodada'a, vailamuiai dava ene'edivo davata boutai 'eva bo'ani, sia bolavuai lavuai nuamu asi'i emabavunu.

<sup>28</sup> Beia kau ka be'oumu, “Iani kanania 'eva dilava dedena devenia ianina” koanai, iani kanaua sia boania, 'olana e'oumu luvana kanaua dainai mai kau ka nuana asi'i emabavunu 'ounai.

<sup>29</sup> Lau sia adiaka oni 'eva ova'eva, beia e'oumu kauna belalovaia oni ova'eva.

Inoku kau ka sibona belavuai lavuai, dava 'ounai kau ka ena lalovailalovaiaia lau e'u komolo belavuai lavuai vaia?

<sup>30</sup> E'u iani Dilava avanama'inala inoku ania koanai, dava 'ounai kau ka lau iani avanama'inala ania 'ounai luva'u eluluva?

<sup>31</sup> Beia dava dava oi o'ani oi o'inu 'o oi ovavai, kataua boutai 'eva Dilava ena nuavi ivala'asina dainai oi bovavai.

<sup>32</sup> Emui mia laloatai Iuda kauta, pulu edea kauta 'o Dilava ena lo'e kauta kataua iva'ekota vinalata sia oi bovavai.

<sup>33</sup> Oi lau avavaia boina oi bovavaia lau kau boutai lalota bavanama dala boutai laloatai. Sibou e'u nama'ina sia akavua, beia boutai eta nama'ina akavua, kanaua 'eva ia vamauli beabia 'ounai.

## 11

<sup>1</sup> Lau Keliso evavaia vitaitana avavaia, oi vaka lau avavaia vitaitana oi bovavaia.

*Meamea Laloanai 'A'ate 'Olata  
Beva'akuavu Luvana.*

<sup>2</sup> Lau oi avanama'inamui, 'olana dava boutai laloatai oi olalovai 'ini'u do'o maivaka vaikabasi avenimui vaikabasita oi oabi 'inita.

<sup>3</sup> Vali'u lau a'ula oi boikabasi kave'i, kau boutai 'olatai kauna 'eva Keliso, ateate 'olanai kauna 'eva ia adana, Keliso 'olanai kauna 'eva Dilava.

<sup>4</sup> Kanaua 'ounai kau boutai 'olata mai ivaakuavuta demeamea 'o Dilava ena luva deluvala 'eva 'olatai kauna Keliso 'olana sia de'aku.

<sup>5</sup> Maivaka ateate 'olana ivaakuavuna asi'i laloanai emeamea 'o Dilava ena luva eluvala ateatena 'eva adana ia 'olanai kauna 'olana sia e'aku, itani ia vuina detalia ovo boina.

<sup>6</sup> Beia ateate ka 'olana sia evaakuavua koanai, ia 'eva vuina beukua. Ateate vuina betalia ovo 'o vuina beukua 'eva mai malalaina 'ounai ateate 'olana 'eva bevaakuavua.

<sup>7</sup> Kau 'eva meamea laloanai 'olana sia bevaakuavua, 'olana ia 'eva Dilava ikaikana maivaka ena nuavi evala'asia, ia ateate 'eva kau ena nuavi evala'asia.

<sup>8</sup> Dilava 'eva ateate kauaninai kau sia evavaia, beia kau kauaninai ateate evavaia.

<sup>9</sup> Mai Dilava 'eva ateate dainai kau sia evavaia, beia kau dainai ateate evavaia.

<sup>10</sup> Kanaua 'ounai ateate 'eva 'olana bevaakuavua, inoku koa kanaua'i anelu beikabasi ia 'eva adana ena siavu venunai emimia.

<sup>11</sup> Ia eta mauili Lovia namana enai maulinai laloanai, ateate 'eva kau kevanai sia beda'atau sibona bemimia maivaka kau 'eva ateate kevanai sia beda'atau sibona bemimia.

<sup>12</sup> Ateate 'eva kau kauaninai easi, maivaka kau 'eva ateate kauaninai epupulu. Beia dava boutai 'eva Dilava kevanai deasi.

<sup>13</sup> Sibomui 'ani oi olalovaia, ateate 'olana sia evaakuavua inoku kau vailatai emeamea 'eva sia ekomolo.

<sup>14</sup> Kanobata maulina laloanai ita 'ani kaikabasi vui laka'ina kau etai 'eva malalai davana,

<sup>15</sup> beia vui laka'ina 'eva ateate ena nuavi davana. Dilava eta'u ateate evenia 'olana ivaakuavunai be'ao.

<sup>16</sup> Beia kau ka e'ula koakoa kanania beadedua vaia koanai, lau aluluva adiaka, lai mai Dilava ena lo'e kauta boutai ita kevamaiai 'eva kukudivo koakoana edeana sia ka.

*Lovia Namana Ena  
Anibou Kabukabuna Luvana.  
(Mt 26.26-29; Mk 14.22-25; Lk 22.14-20)*

17 Vali'u e'u vaikabasi luvana kanania a'oumui laloanai lau 'eva oi sia avanama'inamui, 'olana emui lo'e do'uta oi o'abi 'eva si'avana doutamo devavai beia sia maieta vidulu kau kevatai.

18 Lava'ana'ina 'eva oi valimui a'ika emui lo'e do'uta oi o'abi laloatai 'eva sibomui oi ova'alamamui, luva kanania kena avamomo'aia.

19 (Va'alama 'eva bepupulu sia beasi'i inoku kanana'i 'eva luva umauna deluvala kauta ekaikata une.)

20 Kanaua 'ounai 'abu ka'onamoai oi ododo'u anibou oi boabia, beia kanaua 'eva Lovia namana ena iani kabukabuna umauna sia oi oania.

21 'Olana oi oaniani koanai, ka ka emui iani mo oi o'ani banomui sia oi o'imata, kanaua 'ounai vaida 'eva vikolo deakuta ia vaida 'eva deinu ba.

22 Emui lumai oi bomaaniani mai oi bomainuinu. Dilava ena lo'e kauta oi ovasi'avanata mai kele'etai dava asi'i kauta oi ovamalalaita. A ba'oumui koma? Oi olalovaia vinaula kanania oi ovavaia 'eva bavanama'inamui, una? Asi'i vaika.

23 Vaikabasi kanania oi avenimui 'eva Lovia namana kevanai abia vaikabasina vitaitana. Veni eveni mai kou ekou boninai Lovia namana Iesu palaoa eabia,

24 vanama'ina luvana Dilava evanama'inala. Mulinai 'eva palaoa ekovia inoku eluva ediaka, "Kanania 'eva lau kauani'u aveveni oi emui. Kanania oi bovavai koma lau ilalovai 'ini'u."

25 Deaniani mulinai dala vitaitanai mo 'ou eabia isi inoku eluva ediaka, "Ou kanania 'eva Dilava ena luva'ana'i namana makamakana, lau e'u ba lalanai avamomo'aia. Kanania oi bovavaia oi boinua lau ilalovai 'ini'u melalata boutai laloatai."

26 Palaoa kanania oi oania mai 'ou kanania'i oi oinua melalata boutai, oi 'eva Lovia namana ena ba valina oi okavala beda'amo ia be'asi.

<sup>27</sup> Kanaua 'ounai, kau ka ena lalovai sia ekomolo laloanai palaoa beania 'o 'ouai beinuinu koanai, ia 'eva 'ani eva'eva Lovia namana kauanina mai lalana etai.

<sup>28</sup> Kanaua 'ounai kau ka sibona nuana bekavua kave'i makava inoku palaoa beania mai 'ouai beinuinu.

<sup>29</sup> Olana ia palaoa eania mai 'ouai einuinu beia Lovia namana kauanina sia elalovaia koanai ia 'eva Dilava ena lavuai ianina eania mai inuina einua.

<sup>30</sup> Kanaua 'ounai, oi doutamo 'eva oi o'olele, obadebade maivaka doutamo 'ani deba.

<sup>31</sup> Beia ita sibota nuata ekakavu kave'i makava koanai, Dilava ena lavuai laloanai sia ekadodo.

<sup>32</sup> Beia Lovia namana ita evaluvata mai mekau evenita 'eva evaidibata, inoku kanobata kauta ita mekau sia ekakoala ka'ona 'ounai.

<sup>33</sup> Kanaua 'ounai, bo'akala'u e, oi ododo'u Lovia namana ena iani kabukabuna oi oania koanai banomui oi bo'imata.

<sup>34</sup> Kau ka vikolo beakua koanai, ia 'eva ena lumai beaniani inoku be'asi, inoku oi bododo'u koanai oi Dilava ena lavuai laloanai sia oi bodododo.

Luva vaida 'eva muliai lau bavavasi laloanai ba'oumui.

## 12

*Veniveni Davata Idume Kabukabuna Kevanai De'asi.*

<sup>1</sup> Bo'akala'u e, vali'u lau a'ula oi Idume Kabukabuna ena veniveni davata 'eva oi boikabasita kave'i.

<sup>2</sup> Oi oikabasi, asido'o oi oabiveni laloanai, dilava dedeta sia demauli dilavata kataua deta'u de'ana'ia vaimui maivaka devada'amui tau.



<sup>3</sup> Kanaua 'ounai lau oi a'oumui, Dilava idumena ena viduluai eluluva davana 'eva Iesu sia esi-vadala ediaka, "Iesu 'eva esi'avana," mai Idume Kabukabuna ena vidulu eabia kauna nutunai vaka eluluva ediaka, "Iesu 'eva Lovia namana."

<sup>4</sup> Idume Kabukabuna ena veniveni davata 'eva edeata edeata, beia Idume Kabukabuna ka'onamo mo kanaua etata'u eveveni.

<sup>5</sup> Lovia namana ena vinaula ivavaita dalata 'eva edeata edeata, beia Lovia namana ka'onamo mo da'alana ka'abi.

<sup>6</sup> Ita kau eta mauili laloatai Dilava ena vinaula dalata 'eva edeata edeata, beia Dilava ka'onamo mo etata'u ena kau boutai kula'ila evenita ia ena vinaula ekavavai.

<sup>7</sup> Idume Kabukabuna etata'u abiveni kauta ka ka siavu evenita 'eva Dilava ena lo'e kauta boutai iduluta eta nama'ina 'ounai.

<sup>8</sup> Idume Kabukabuna etata'u kau ka aoneka luvata evenia be'oulai, Idume Kabukabuna ka'onamo mo kanaua etata'u ka idiba luvata evenia be'oulai.

<sup>9</sup> Idume Kabukabuna ka'onamo mo kanaua etata'u kau ka abiveni evenia, Idume Kabukabuna ka'onamo mo kanaua etata'u ka 'olele ivanama'inata siavuna evenia 'olele 'o anana bevanama'inata.

<sup>10</sup> Idume Kabukabuna kanaua etata'u kau ka siavu evenia vatabulovo koata bevavai, ka 'eva enolea luvata be'oulai, mune'e ka siavu evenia idume edeata edeata eta edeana be'ou dae, ka siavu evenia lele edeata edeatai beluluva, ka 'eva siavu evenia lele edeata edeatai deluvaluva anita bevakeini.

<sup>11</sup> Dava katania boutai 'eva Idume Kabukabuna ka'onamo ia sibona evavaita, ia etata'u kau boutai ka ka veniveni edeata edeata evenita ia sibona ena ula vitaitanai.

*Ita Boutai 'Eva  
Kauani Ka'onamo Le'ena.*

<sup>12</sup> Kau kauanina 'eva ka'onamo, beia le'ena 'eva edounamo, inoku le'e kataua 'eva kauani ka'onamoai detai 'au. Inoku Keliso vaka kanauamo boina.

<sup>13</sup> Vitaitanamo ita boutai Iuda kauta 'o 'Elene kauta, da'alabi kauta 'o da'ala sia de'abi kauta Idume Kabukabuna ka'onamo eta'u kauani ka'onamoai evaidi'uta kabukabu, ita boutai 'eva Idume Kabukabuna ka'onamo kabia nuatai emimia.

<sup>14</sup> Kau kauanina le'ena 'eva edounamo ia sia ka'onamo.

<sup>15</sup> Inoku ae bemaluva bemadiaka, “Lau 'eva sia ima 'ounai lau 'eva sia kauani le'ena ka,” inoku luva kanaua bemaluvala beia ae 'eva kauani le'ena kai sia ekavaoa 'eva dalana asi'i.

<sup>16</sup> Mai kaia bemadiaka, “Lau 'eva sia maka 'ounai, lau 'eva sia kauani le'ena ka,” inoku luva kanaua bemaluvala beia kaia 'eva kauani le'ena kai sia ekavaoa 'eva dalana asi'i.

<sup>17</sup> Inoku kauani itoinai maka ai bema koanai, lele a bemaika koma? 'O kauani itoinai kaia ai bema koanai, bona a bemalalai koma?

<sup>18</sup> Sia kanaua boina. Dilava ena ula vitaitanai kauani le'ena boutai 'abuta umautai ene'etadivo inoku ka ka eta vinaula umauta bevavai.

<sup>19</sup> Bema le'e boutai 'eva le'e ka'onamoai bema koanai, kauani 'eva a'ia'i?

<sup>20</sup> Kauani 'eva sia kanaua boina. Kauani 'eva ka'onamo beia le'ena 'eva edounamo.

<sup>21</sup> Kanaua 'ounai maka 'eva ima sia be'outa bediaka, “Lau oi sia aula venimui,” 'Ola vaka ae sia be'outa bediaka, “Lau oi sia aula venimui.”

<sup>22</sup> Asi'i. Le'e kataua kauaniai debadebade le'eta bemaasi'i koanai kauani 'eva sia bevinaula kave'i.

23 Mai kalalovaia kauani le'ena vaida eta vinaula dekiki le'eta 'eva ka'imata kave'i, maivaka le'e kamalalaivai le'eta kataua 'eva tubu'ai ka'alavuta kave'i.

24 Beia le'e ikata denama'ina le'eta 'eva lovata sia ka'aku. Dilava kauani kanania evavaia koma 'eva le'e boutai evaka'onamota kauani ka'onamoai, debadebade le'eta vaka e'imata kave'i.

25 Kanaua 'ounai kauani laloanai 'eva koa kole asi'i, beia le'e boutai 'eva bevaka'onamo ka ka bevidulu viveni.

26 Bema le'e ka beanana koanai le'e boutai 'eva ia ita beanana ka'ona, bema le'e ka vana bevanama'inala koanai boutai ia ita belalonama ka'ona.

27 Vali'u oi boumuiai 'eva Keliso kauanina, inoku oi ka ka 'eva ia kauanina le'ena ka ka.

28 Dilava eta'u ena lo'e laloanai kau eabita isi, lava'ana'ina 'eva veauneke kauta, ivaluana 'eva enolea kauta, ivakoina 'eva vaikabasi kauta, maivaka siavu koata edeata edeata bevavai kauta, ia mulitai 'eva 'olele bevanama'ina kauta, vaida vidulu kauta, vaida 'ana'iavai kauta, mai vaida lele edeata edeatai beluluva kauta.

29 Ia boutai 'eva sia veauneke kauta mo, boutai 'eva sia enolea kauta mo. Boutai 'eva sia vaikabasi kauta mo. Boutai 'eva sia siavu koata bevavai kauta mo.

30 Boutai 'eva sia 'olele bevanama'ina kauta mo. Boutai sia mala edeata edeatai beluluva kauta mo. Boutai sia mala edeata anita bevakeini kauta mo.

31 Idume Kabukabuna ena veniveni namata venivenita oi boula venita.

Vali'u lau batata'u dala nama'ina umauna dalana bavaikamui.

# 13

## *Lalo'au.*

<sup>1</sup> Lau lele edeata edeata mai anelu leletai bamaluva, beia keva'uai lalo'au asi'i koanai, lau 'eva itani kapa 'o 'ana'ile de'aku 'ulutamo devuvua davata boita.

<sup>2</sup> Lau enolea venivenina bamaabia 'o Dilava ena luva vunita mai idiba boutai bamaikabasita, maivaka e'u abiveni bemakula'ila vaika lolo bamavailuta, beia mo keva'uai lalo'au asi'i koanai, lau 'eva dava asi'i.

<sup>3</sup> E'u dava boutai ta'ovala kauta bamavenita, maivaka kauani'u bamaveni 'avaea 'alovai bema'abua bemaani palu, beia mo keva'uai lalo'au asi'i koanai, kataua boutai eta nama'ina asi'i lau keva'uai.

<sup>4</sup> Lalo'au koana 'eva vapasisi mai 'eluovo, lalo'au koana 'eva sia mama 'o sia vana eabi isi 'o sia apa.

<sup>5</sup> Lalo'au koana 'eva sia vabo'obo'o, sia idono, sia ebadu molaumolau mai kau eta va'eva sia elalovai 'ini.

<sup>6</sup> Lalo'au koana 'eva si'avana sia elalonama venia, beia ia 'eva komolo vinalana elalonama venia.

<sup>7</sup> Lalo'au koana 'eva dava boutai laloatai sia evuakao, ena abiveni sia ebadebade, melala boutai nuabatai emimia mai evapasisi dava boutai laloatai.

<sup>8</sup> Lalo'au 'eva bemia keinikeini. Enolea luvata be'oulai beia 'ani beole, lele edeata edeatai beluluva beia 'ani beole, idiba luvata be'oulai beia vaka 'ani beole.

<sup>9</sup> 'Olana eta idiba 'eva dekiki mai eta enolea luvata vaka dekiki mai sia dekomolo kave'i,

<sup>10</sup> beia komolona umauna be'asi koanai, dava sia dekomolo kave'i davata kataua 'eva betaule.

<sup>11</sup> Lau melo'uai koanai e'u luvaluva, e'u lalovai lalovai, e'u ikabasi boutai 'eva dekiki, beia vali'u lau 'ani akau laloanai melo eta koakoa kataua boutai 'ani avikanita.

<sup>12</sup> Dava vali'u ka'ika 'eva itani oleole avuavunai va'ava'ata ka'ika boina, muliai 'eva bela'asi kave'i ekaikata kave'i. Dava boutai vali'u 'eva kava'ita mo aikabasi, beia muliai 'eva baikabasita kave'i, itani Dilava lau eikabasi'u kave'i boina.

<sup>13</sup> Vali'u dava koina katania 'eva bemia keinikeini, abiveni, nuabata, mai lalo'au. Beia katania koina viloatai nama vaikana 'eva lalo'au.

## 14

### *Enolea Venivenina Mai Mala Edeanai Eluluva Venivenina.*

<sup>1</sup> Lalo'au dalanai oi bodada'a, Idume Kabuk-abuna ena veniveni davata 'eva oi boulaivenita vaika, beia enolea venivenina oi boula venia namana kanaua'i Dilava valina oi bokakava.

<sup>2</sup> 'Olana kau ka lele edeana ai eluluva 'eva kau sia e'outa beia Dilava e'oua, luva umauna ena luva ovota sia be'ovo, ia 'eva dava vuniata eluvavaita Idume Kabukabuna ena siavuai.

<sup>3</sup> Beia enolea kauna 'eva Dilava ena luva eluvala kau kevatai, eduluta, nuata evakula'ilata, maivaka nuata evapasisita.

<sup>4</sup> Kau kanaua lele edeanai eluluva kauna ia sibona mo edulua, beia enolea kauna 'eva Dilava ena lo'e kauta boutai eduluta.

<sup>5</sup> Lau a'ula boumuiai lele edeata edeatai oi boluluva beia e'u ula umauna 'eva oi boenolea, enolea kauna 'eva namana vakaia lele edeata edeatai eluluva kauna, 'olana lele edeana kanaua bevakeini kauna asi'i koanai Dilava ena lo'e kauta boutai vaka iduluta dalana asi'i.

<sup>6</sup> Bo'akala'u e, lau bamavasi kevamui'ai lele edeata edeatai bamaluva, beia luva kataua Dilava evala'asi luvata, idiba luvata, enolea luvata, 'o vaikabasi luvata vaida sia bamaabi bamavasi koanai, lele edeanai baluluva ena nama'ina 'eva dava oi kevamui'ai? Ena nama'ina asi'i umauna.

<sup>7</sup> Vitaitana dava vaida sia demauli beia akatai 'ulu kavavua davata kataua, siau 'o kita, 'uluta sia bekomolo kave'i koanai kau a beikabasi koma masi davana 'uluna devavuala.

<sup>8</sup> Vitaitana kuali bisina euvia kauna bisi sia beuvia kave'i koanai dai beva'olu kuali belavala avu?

<sup>9</sup> Kevamui'ai vaka kanauamo boina, oi lelemui'ai luva sia oi boluva kave'i koanai kau ka a beikabasi koma oi dava oi o'oua? Kanaua 'eva oi 'ani oluva 'avaea luva 'avaea mo.

<sup>10</sup> Luva umauna kanobata kanania itoina laloanai lele edeata edeata 'eva doutamo, inoku boutai 'eva mai anita.

<sup>11</sup> Kau ka lele kanaua eluvala inoku lau sia aikabasia koanai, eluluva kauna lau keva'uai ia 'eva kanobata edeana kauna, lau vaka kanobata edeana kau'u ia kevanai.

<sup>12</sup> Kevamui'ai vaka kanauamo boina. Oi oula vaika Idume Kabukabuna ena veniveni davata oi bo'abi 'ounai, veniveni kataua Dilava ena lo'e kauta beduluta mai bevakula'ilata venivenita 'eva Dilava kevanai oi bonoinoi vaita kula'ila.

<sup>13</sup> Lele edeanai eluluva kauna 'eva emameamea Dilava emanoia luva iabi keinita emaikabasi inoku luva eluvata luvata 'eva bevakeinita.

<sup>14</sup> 'Olana lau lele edeanai ameamea koanai, idume'u 'eva emamea beia lau nua'u 'eva sia eikabasi dava.

<sup>15</sup> Inoku lau dava bavavaia? Lau idume'u ai bameamea 'eva nua'u ai vaka bameamea. Lau

idume'uai bamamasi 'eva nua'u ai vaka bama-  
masi.

<sup>16</sup> Inoku oni idumemuai Dilava vanama'ina  
luvana ovenia koanai, kau 'avaeana ka emu  
vanama'ina luvana meameana kanaua ovona sia  
be'ovo kauna “Amen” a be'oua koma.

<sup>17</sup> Emu vanama'ina luvana meameana Dilava  
kevanai meameana enama'ina vaika, beia kau  
vaida 'eva sia eduluta.

<sup>18</sup> Lau Dilava avanama'inala, 'olana lau melala  
doutamo lele edeata edeata a'oulai vakaia oi  
boumuiai.

<sup>19</sup> Lau a'ula Dilava ena lo'e do'una laloanai lele  
edeata edeatai luva da 'ouka (10,000) sia balu-  
vavai, beia luva ima ovota be'ovo luvata balu-  
vavaita beduluta eta ikabasi bepupulu.

<sup>20</sup> Bo'akala'u e, dava katania kevatai melo kikita  
eta lalovailalovaiai sia oi bolalovaita, ia si'avana  
ivavaita melalatai oi 'eva melo 'oma'omata boitai  
oi bo'ao, beia emui lalovailalovaiai oi 'eva kau  
namata boitai oi bo'ao.

<sup>21</sup> Puka kabukabunai kanania eleleia koma,  
“Lovia namana eluluva ediaka,  
lele edeata edeata kauta mai  
kanobata edeata kauta nututa  
bibi'atai lau batata'u kau katania  
kevatai e'u luva baluvala.  
Beia Iuda kauta katania 'eva  
lau lele'u sia be'ika.”

Isa 28.11, 12

<sup>22</sup> Kanaua 'ounai lele edeatai beluluva 'eva sia  
deabiveni kauta beikabasi koa kanaua 'eva Dilava  
kevanai e'asi, ua 'evaia sia deabiveni kauta daitai,  
beia enolea 'eva abiveni kauta koa kanaua'i eta  
abiveni bekula'ila, ua 'eva ia deabiveni kauta  
daitai.

<sup>23</sup> Inoku Dilava ena lo'e kaumui boumuiai oi bododo'u laloanai, lele edeata edeatai oi boluluva inoku kau dava katania ovota sia de'ovo kauta mai sia deabiveni kauta do'u kanaua laloanai abiveni kaumui lele edeata edeatai oi oluluva lelemui be'ika koanai, ia bediaka oi 'eva 'olamui desi'avana.

<sup>24</sup> Beia boumuiai enolea luvata oi boluluva laloanai, kau dava katania ovota sia de'ovo kauta 'o sia deabiveni kauta lelemui be'ika koanai beik-abasi ia 'eva si'avana kauta. Inoku luva de'ika luvana betata'u ia bevaluvata,

<sup>25</sup> ia eta lalovai vuniata boutai bevala'asi, inoku bekukudivo Dilava bevanama'inala beluluva bediaka, "Luva umauna Dilava 'eva nia'i oi viloa-muiai."

*Dilava Ena Lo'e Ena Vinaula.*

<sup>26</sup> Kanaua 'ounai, bo'akala'u e, dava ekakoma? Oi ododo'u oi omeamea koanai masi ka oi oabia, ka evaikabasi, ka 'eva Dilava dava ka kevanai evala'asia davana valina ekakava, ka lele edeanai eluluva, maivaka ka 'eva lele edeana luvana kanaua evakeinia. Dava katania boutai oi ovavai 'eva Dilava ena lo'e kauta iduluta mai ivakula'ilata.

<sup>27</sup> Lele edeatai oi oluluva koanai, kau ka'onamo, lua 'o koi mo oi boluluva, beia melala ka'onamoai sia oi boluluva, ka beluva makava inoku ka mulinai boluluva, maivaka kau ka betata'u luva oi oluvala luvana bevakeinia.

<sup>28</sup> Beia lele edeata luvata iabikeinita kauna asi'i koanai, lele edeana ai eluluva kauna sia beluva 'unu'unu lo'e do'una kanaua laloanai, ia sibonamo kevanai mai Dilava kevanai beluluva.

<sup>29</sup> Enolea kauna ka'onamo, lua 'o koi mo beilolo inoku banota vaidā 'eva luva kataua deluluva luvata belalovailalovai vaita kave'i.



<sup>30</sup> Dilava ena luva ka be'asi demimia kaiata devala kauta ka kevanai bela'asi koanai, eilolo makava kauna kanaua bevuakao inoku Dilava ena luva e'asi luvana lлена be'ika.

<sup>31</sup> Dala kanania'i enolea kaumui boumuiai ka'o ka'o Dilava ena luva oi boluvala, inoku kau boutai beikabasia maivaka bekula'ila.

<sup>32</sup> Enolea luvata beluvavai kauta ia 'eva bevi'ima beda'amo eta melala bedaia inoku beluluva.

<sup>33</sup> 'Olana Dilava 'eva sia kau evaakuleta Dilavana, beia ia 'eva nua'elu Dilavana. Dilava ena kau eta lo'e do'uta boutai laloatai devavaia boina,

<sup>34</sup> 'a'ate 'eva sia beluluva lo'e do'uta laloatai. Ia 'eva sia maieta komolo beluluva, Mose ena talavatu eluva vitaitana ia 'eva sia be'ola.

<sup>35</sup> 'A'ate de'ula dava ka beikabasia koanai eta lumai ua'i adata belavuaia, 'olana ateate ka Dilava ena lo'e do'unai beluluva 'eva maimalalaina.

<sup>36</sup> Oi olalovaia Dilava ena luva 'eva oi Kolinto kaumui kevamuiai ela'asi? 'O oi mo sibomui daimuiai easi? Asi'i vaika.

<sup>37</sup> Kau ka elalovaia ia 'eva enolea kauna 'o Idume Kabukabuna ena veniveni ka eabia koanai, ia beikabasi kave'i lau dava alele venimui davata 'eva Lovia namana ena talavatu luvata.

<sup>38</sup> Beia ia talavatu katania sia beabita dae koanai oi vaka ia lлена sia oi boabia dae.

<sup>39</sup> Kanaua 'ounai, bo'akala'u e, enoleai Dilava ena luva iluvana 'eva oi bokaualo vaia, beia lele edeatai beluluva kauta sia oi bo'outa kao.

<sup>40</sup> Dava boutai 'eva dala komolonai mai vitaitata umautai oi bovavaita.

## 15

*Keliso Ena Ko'isi 'Udai.*

<sup>1</sup> Bo'akala'u e, vali'u lau a'ula vali nama'ina ailolo vaia kevamui'ai valina oi oabia kanaua akanai emui abiveni belava 'ini valina bavalalovai 'inimui.

<sup>2</sup> Vali nama'ina kanaua ailolo vaia kevamui'ai valina oi boabi 'inia koanai mauli oi boabia, kanaua 'ounai oi 'eva sia oi oabiveni 'avaea.

<sup>3</sup> Lau vali nama'ina abia valina oi avenimui, kanania 'eva dava namavaikana. Kanaua 'eva Puka Kabukabunai deleleia vitaitana Keliso 'eva ita eta si'avana daitai eba,

<sup>4</sup> ia dekoleia, inoku Puka kabukabunai deleleia vitaitana melala ivakoinai eko'isi 'udai emauli.

<sup>5</sup> Ia Petelo kevanai ela'asi makava muliai veauneke kauta 'ouka lua kevatai ela'asi.

<sup>6</sup> Kanaua mulinai ia 'eva abiveni kauta sinavu ima mai maikalina boutai melala ka'onamoai kevatai ela'asi, kau kataua doutamo 'eva vali'u de-mauli do'o, ia vaida 'eva 'ani deba.

<sup>7</sup> Inoku ia ela'asi Iakobo kevanai, muliai veauneke kauta boutai kevatai ela'asi.

<sup>8</sup> To'ona umaunai 'eva keva'uai vaka ela'asi, lau 'eva pulu dalana umaunai sia apulu kau'u.

<sup>9</sup> Veauneke kauta boutai viloatai lau 'eva akiki vaika, inoku lau sia maie'u komolo be'ae'u veauneke kau'u, 'olana lau Dilava ena lo'e kauta avaivivita.

<sup>10</sup> Beia Dilava ena iulaveni koana 'ounai lau 'eva veauneke kau'uai a'ao, mai ena iulaveni koana eveni'u davana anina 'eva sia easi'i. Lau 'eva avinaula kula'ila vaika vakaia veauneke kauta boutai, beia kanaua 'eva lau sia sibo'u avinaula, ia Dilava ena iulaveni koana lau keva'uai davana evakula'ila'u avinaula.

<sup>11</sup> Kanaua 'ounai lau ailolo vaia 'o veauneke kauta vaida deilolo vaia, beia Iesu eba mai eko'isi 'udai valina lai ailolo vaia valina oi oabivenia.

*Ita Eta Ko'isi 'Udai.*

12 Vali'u lai 'eva Keliso bai eko'isi 'udai kauna valina lai ailolo vaia, inoku dava 'ounai oi vaidai oi odiaka bai ko'isi 'udai 'eva asi'i oi okoma?

13 Inoku bai ko'isi 'udai asi'i koanai Keliso vaka bai sia bemako'isi 'udai.

14 Keliso bai sia bemako'isi koanai, lai emai ilolo 'eva anina asi'i, inoku oi emui abiveni vaka anina asi'i.

15 Kanaua akanai, lai 'eva 'ani dede kaumaiai lai bamao 'olana Dilava valina lai aluvala 'eva ia Keliso bai evako'isia 'udai. Beia bai ko'isi 'udai asi'i koanai, Dilava vaka Keliso bai sia bemavako'isia 'udai.

16 'Olana bai ko'isi 'udai asi'i koanai, Keliso vaka sia bemako'isi 'udai.

17 Inoku Keliso sia bemako'isi 'udai koanai, oi emui abiveni 'eva anina asi'i, oi 'eva si'avana laloanai oi bomamia do'o.

18 Inoku kanania anina 'eva Keliso deabivenia deba kauta 'eva 'ani bemataule.

19 Vali'u kanobata maolina kanania sibona mo dainai eta nuabata Keliso enai kane'eadivo koanai, ita 'eva bemalalota vaika vakaia kanobata kauta boutai.

20 Beia luva umauna Keliso 'eva bai eko'isi 'udai. Kanaua 'eva ba kauta eta ko'isi 'udai koana lava'ana'ina.

21 Ba 'eva kau ka'onamo ena koakoa dainai easi, vitaitanai bai ko'isi 'udai vaka kau ka'onamo ena koakoa dainai e'asi.

22 Itani Adamu ena si'avana daitai kau boutai deba, vitaitanai Keliso dainai kau boutai bemaui.

23 Beia ko'isi 'udai dalana umaunai Dilava be-tata'u ka ka bevako'isita 'udai. Lava'ana'ina 'eva Keliso, muliai 'eva ia ena mue 'udai melalanai ia deabivenia kauta kataua.

24 Kanaua mulinai kanobata to'ona be'asi. Melala kanaua'i Keliso betata'u ka'uba si'avata vaika eta 'ola kauta boutai, lovia kauta boutai, mai siavu kauta boutai bevaoleta, inoku ia ena lovia vanuana bevamuea Kamana Dilava imanai beudala.

25 Keliso 'eva belovia bemimia beda'amo Dilava betata'u 'ou kauta boutai Keliso aena palapalana venunai bene'eta divo.

26 To'onai 'ou kauna Iesu betata'u bevaolea 'eva ba.

27 Puka kabukabuna kanania eluva koma, “Dilava dava boutai ia aena palapalana venunai ene'eta divo.” ‘Dava boutai’ ekoma 'eva ita kaikabasi kave'i Dilava 'eva sia Keliso aena palapalana venunai, Dilava eta'u dava boutai Keliso aena palapalana venunai ene'eta divo.

28 Dava boutai Nakuna ena ikakao venunai beao mulinai, Nakuna sibona betata'u bevuala beda'a Kamana ena ikakao venunai bemimia. Inoku dava boutai 'eva Dilava be'olavai palu kave'i.

29 Ko'isi 'udai bema asi'i koanai, kau devaidi'uta kabukabu 'ani deba kauta kataua ilalovaitai 'eva dava deulavenia 'ounai kanaua dekoma? Ba kauta sia beko'isi 'udai dokadoka koanai, dava 'ounai kau kataua devaidi'uta kabukabu ba kauta daitai?

30 Dava 'ounai lai melala boutai vailamaiai ba emimia bana sia lai amakau vaia?

31 Bo'akala'u e, emui mauili Keliso Iesu laloanai maulina kanaua lau apavaia 'ounai luva umauna a'oumui. Lau 'eva melala boutai ba mo vaila'uai emimia.

32 Lau Epesoai kau kataua itani sisi aivalata boita kauta ita kau eta lalovai daitai lai aviaku koanai, ena nama'ina 'eva dava lau keva'uai? Beia ba kauta sia beko'isi 'udai koanai, luva kanania

melala boutai deluvala luvana kavavaia, “Ita kaniani mo, kainuinu mo, 'olana mala 'eva ekaba.”

<sup>33</sup> Kanaua deluva koma kauta asi'i demalebamui. “Kau si'avata vaika ita oi bovaka'ona 'eva emui koakoa nama'ita bevasi'avanata.”

<sup>34</sup> Olalovai lalovai kave'i si'avana vinaulata ovikanita, 'olana kanania aluvala 'eva beva malalaimui, oi vaida 'eva Dilava sia oi oikabasia.

### *Ko'isi 'Udai Kauanina 'Eva Edeana.*

<sup>35</sup> Beia kau ka belavuui lavuui bediaka, “Ba kauta a beko'isi 'udai koma? Kauani davanai be'ao?”

<sup>36</sup> Kanania 'eva bo'o lavuaina. Kea oi ovadoa keana sia beba makava koanai, ia 'eva sia be-mauli.

<sup>37</sup> Dava ovadoa davana 'eva kea 'avaeana, ama'i witi keana 'o kea edeana ka, beia au kanaua bekukubu auna itoina sia ovadoa.

<sup>38</sup> Beia Dilava etata'u kea kanaua kauanina ka evenia ia ena ula vitaitanai, ia etata'u kea ka ka kauanita umauta mo evenita.

<sup>39</sup> Mauli davata boutai kauanita 'eva sia vitaita. Kau kauanita edeata, odola sisi kauanita edeata, manumanu kauanita edeata, 'atu sisi kauanita vaka edeata.

<sup>40</sup> Vutuvutu davata kauanita boutai, mai kanobata davata kauanita vaka boutai. Beia vutuvutu davata kauanita eta nuavi 'eva edeata, kanobata davata kauanita eta nuavi vaka edeata.

<sup>41</sup> Melala ena nuavi 'eva edeana, vuia vaka ena nuavi edeana mo, visiu eta nuavi vaka ka mo. Inoku visiu ka ka eta nuavi vaka edeata edeata mo.

<sup>42</sup> Inoku ba kauta beko'isi 'udai vaka kanauamo boina, kauani kakolea laloanai ia 'eva epepeda

etaule, beia beko'isi 'udai 'eva bemaui keinikeini sia besi'avana.

<sup>43</sup> Kakolea laloanai, ikana esi'avana maivaka ebadebade, beia beko'isi 'udai laloanai ikana 'eva benuavi maivaka bekula'ila.

<sup>44</sup> Kanobata kauaninai kakolea, eko'isi 'udai 'eva idume kauaninai.

Kanobata kauanina 'eva edeana, mai idume kauanina vaka 'eva edeana.

<sup>45</sup> Puka kabukabunai 'ani ilelena boina, “Kau lava'ana'ina Adamu 'eva mauui kauaniai eao.” Beia Adamu mulinai kauna Keliso 'eva mauui eveveni Idumena.

<sup>46</sup> Idume kauanina sia easi makava, kanobata kauanina e'ana'ia vakaia mulinai 'eva idume kauanina easi.

<sup>47</sup> Kau lava'ana'ina Adamu 'eva kanobata apulolonai evavaia, kau ivaluana Keliso 'eva vutuvutuai easi.

<sup>48</sup> Kanobata kauta 'eva kanobatai easi kauna vitaitana, vutuvutu kauta 'eva vutuvutuai easi kauna vitaitana.

<sup>49</sup> Kanobatai easi kauna ikaikanai ka'ao vitaitana, kanaua 'ounai vutuvutuai easi kauna vaka ikaikanai ekao.

<sup>50</sup> Bo'akala'u e, lau dava a'oua davana kanania, kauani vidio mai lalai epulu kauanina kanaua Dilava ena lovia vanuanai sia beda'adodo, maivaka kauani bebaba kauanina 'eva sia bemaui keinikeini.

<sup>51</sup> Kaiamui ovala, lau dava vuniana ka bavaikabasimui, ita boutai 'eva sia ekaba palu, beia ita boutai Dilava betata'u bevaedeanata,

<sup>52</sup> bemolau vaika itani maka kava'unumai boina bisi to'ona be'alala laloanai. Bisi 'uluna bevuvua koanai Dilava betata'u ba kauta

bevako'isita 'udai sia bebaba kautai be'ao, inoku ita boutai bevaedeanata.

<sup>53</sup> 'Olana kauani bepepeda kauanina bevaedeanala sia bepepeda kauaninai be'ao, maivaka kauani bebaba kauanina bevaedeanala sia bebaba kauaninai be'ao.

<sup>54</sup> Inoku kauani bepepeda kauanina bedeanau kauani sia bepepeda kauaninai be'ao maivaka kauani bebaba kauanina bedeanau kauani sia bebaba kauaninai be'ao koanai, Puka kabukabunai ilelena luvana 'eva bemomo'ai, "Dilava eta'u ba ena siavu evaolea ba evaolea vaika."

Isa 25.8

<sup>55</sup> "Ba e, oni bovaba siavuna a'ia'i? Ba e, oni bovanana siavuna a'ia'i?"

Hos 13.14

<sup>56</sup> Ba ena vanana siavuna 'eva si'avana kevanai eabia, beia si'avana ena siavu 'eva talavatu kevanai eabia.

<sup>57</sup> Dilava ekavanama'inala! Ia eta'u ita kevatai ba ena siavu evaolea eta Lovia namana Iesu Keliso kaunai.

<sup>58</sup> Kanaua 'ounai, bo'akala'u ma'adi e, oi bolava 'ini, kau ka sia beva'iuvai 'iuvaimui, melala boutai Lovia namana ena vinaula oi bovavai basibasi, 'olana oi oikabasi Lovia namana ena vinaula oi ovavaia 'eva sia oi ovinaula 'avaea.

## 16

### *Dilava Ena Kau Iduluta Monina.*

<sup>1</sup> Vali'u oi Dilava ena kau Iudeai demimia kauta iduluta daitai moni oi bodoubou luvana 'eva kanania, Dilava ena lo'e kauta Kalatia kanonai

demimia kauta a'outa moni dedoubou dalana vitaitana oi bovavaia.

<sup>2</sup> Masi ka ka bonita lava'ana'ita boutai laloatai oi ka ka emui davali vitaitanai moni kikita keta oi bone'eta tau oi bodoubou bedouta, inoku lau bavavasi koanai moni doubou do'una ka sia ekavavaia.

<sup>3</sup> Lau kevamui ai bavavasi koanai oi oabita isi kauta luvata iluvana malelena balelea bavenita inoku ekasinita, emui ainama monita beabita beda'a Ielusalema.

<sup>4</sup> Inoku bema lau mai ia lai badada'a benama'ina koanai, ia lau bebano'u ita lai badada'a.

*Paulo Ena Lalovai  
Eva'oluta Lalovaita.*

<sup>5</sup> Lau alalovaia Makedonia kanonai bakeini makava ia baikata mulinai bavasi kele'emui.

<sup>6</sup> Lau melala kava'ina mo oi kevamui ai bamimia 'o ekamia beda'amo 'elu melalana be'ole, inoku e'u da'a to'ato'a 'abuta ka ka badada'a laloatai oi bodulu'u.

<sup>7</sup> Lau sia a'ula vali'u e'u da'a ai melala kava'inamo 'ileoloai baikamui inoku bakeini badada'a. E'u nuabata 'eva Lovia namana be'ula koanai lau oi ita kamamia dau'a.

<sup>8</sup> Beia lau 'eva nia'i mo Epeso vanuanai bamimia beda'amo Pentikoste melalana beabia.

<sup>9</sup> 'Olana Dilava ena vinaula dalana nutualana 'ani eluvuia ena vinaula namana nia'i bavavaia. Beia ivaivivi'u kauta vaka doutamo.

<sup>10</sup> Timoteo bevavasi kele'emui koanai oi boabia dae, nuana oi bovakula'ilala ita oi bomimia asi'i emamakau, ia 'eva Lovia namana ena vinaula evavaia kauna lau boi'u.

<sup>11</sup> Sia kau ka ia iabidaena beba'oa, beia oi bodulua oi bosinia mai nua'eluna be'asi, inoku



ia bemumue be'asi keva'u, lau 'eva ia a'imala bo'akalata vaidia ita bemumue be'asi.

<sup>12</sup> Bo'akalata Apolo valina 'eva kanania boina, avaasiasia kula'ila bo'akalata vaidia ita bevavasi, beia vali'u 'eva sia e'ula, muliai melala nama'ina ka nuana bedaia koanai 'ani bevasi.

*Vanama'ina Luvana To'ona.*

<sup>13</sup> Oi bo'imamui kave'i, emui abiveniai oi bolava 'ini, nuamui oi bovapisita, maivaka oi bokula'ila.

<sup>14</sup> Dilava mai kau oi bolalo'au venita, koakoa kanania'i emui vinaula boutai oi bovavai.

<sup>15</sup> Oi oikabasi Akaia kanona laloanai Sitepano mai ena luma kauta ita 'eva delalo'udai makava Dilava ena kauai deao inoku ia sibota eta mauili deveni Dilava ena lo'e kauta deduluta. Bo'akala'u e, lau 'eva oi avasiasimui,

<sup>16</sup> abiveni kauta kataua boita mai vaidia ia ita devinaula ka'ona deduluta kauta leleta oi bo'ika.

<sup>17</sup> Sitepano, Polotunato mai Akaiko deasi 'eva alalonama, 'olana oi oda'a tau laloanai ia 'eva oi 'abumui deabi.

<sup>18</sup> Ia deta'u e'u nua bavunu devaolea, oi emui nua bavunu vaka devaolea. Kau kataua boita 'eva eka abita dae kave'i.

<sup>19</sup> Dilava ena lo'e kauta Asia kanona laloanai kauta eta vanama'ina luvata desinita kele'emui ai, Akula mai Pilisikila eta vanama'ina luvana vaka Lovia namana vanai desinia, mai Dilava ena lo'e kauta ia eta luma laloanai dedodo'u kauta eta vanama'ina luvana vaka desinia.

<sup>20</sup> Bo'akalata nia'i demimia kauta boutai eta vanama'ina luvata desinita. Oi ka ka sibomui viba'u kabukabunai oi bovanama'ina.

<sup>21</sup> Lau Paulo sibo'u ima'uai e'u vanama'ina luvana kanania alelea.

<sup>22</sup> Kau ka Lovia namana sia elalo'au venia  
kauna ia 'eva sivada laloanai bemimia.

Lovia namana e,  
Mai! (Malana Ta!)

<sup>23</sup> Ameamea Lovia namana Iesu ena iulaveni  
koana kevamui ai bemimia.

<sup>24</sup> E'u lalo'au 'eva oi boumui ai kevamui ai Keliso  
Iesu laloanai. Amen.

**Luva'ana'i Namana Makamakana**  
**The New Testament in the Nara language of Papua**  
**New Guinea**  
**Nupela Testamen long tokples Nara long Niugini**

copyright © 2024 Global Bible Translators

Language: Nara (Lala)

Dialect: Nara

Translation by: GBT

Contributor: SIL Papua New Guinea and Namseul Presbyterian Church in South Korea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-08-29

---

PDF generated using Haiola and XeLaTeX on 3 Sep 2024 from source files dated 29 Aug 2024

f0f11a93-ea2f-5af2-b48b-3653b522a3fb